

四庫全書

集部

欽定四庫全書總目卷一百七十八

集部三十一

別集類存目五

北虞先生遺文八卷

安徽巡撫
採進本

明邵圭潔撰圭潔字伯如一字茂齋號北虞常熟

人嘉靖己酉舉人其詩妥適而乏警策惟散文筆

力頗縱宕然史論諸篇縱橫曼衍已啟後來顧大

韶等之風是集爲其子兵部主事釐所編分爲二

帙前一帙凡六卷繕寫多脫誤後一帙凡二卷與

前帙間有重複豈編次未定之本歟

平山文集八卷詩集八卷

直隸總督
採進本

明何濤撰濤字仲平江西廣昌人嘉靖己酉舉人
據集中所言蓋嘗官於安慶不知爲安慶何官也
詩文皆率所欲言詩集第五卷有讀白集卒業一
首可以知其宗尙矣

子威集三十二卷

兩淮馬裕
家藏本

明劉鳳撰鳳有續吳中先賢贊已著錄其文皆僻
字與句尤澀體之餽飭者江左勝談載劉侍御子

威好爲詰屈聱牙之文里有卜士袁景休者每向人抉摘其字句鉤棘文義紕繆者以爲姍笑子威聞之怒訴於邑尉攝而笞之尉數之曰若復敢姍笑劉侍御文章耶景休仰而對曰民寧再受笞數十終不能改口嗇否妄諛劉侍御也是亦可資笑噓者矣

素園存藁十八卷

浙江巡撫
採進本

明方宏靜撰宏靜字定之歙縣人嘉靖庚戌進士朱彝尊明詩綜載其官至南京戶部右侍郎千頃

堂書目亦同江南通志則載其奉使入浙擊水寨
寇論功當叙中蜚語歸卒贈工部尙書據集內山
中藁小序稱自撫浙待命凡十載自留京歸田經
廿載葉向高序亦云然是宏靜實自南京罷歸通
志所記偶誤也是集目錄祇十六卷而書實十八
卷其目錄之次序前後參互亦與卷內不合皆校
刊之疎漏又千頃堂書目載是集作二十卷殆初
刻十六卷後增至十八卷又增至二十卷而目則
未改歟

雲山堂集六卷

浙江孫仰曾家藏本

明魏裳撰裳字順甫蒲圻人嘉靖庚戌進士官至
濟南府知府明史文苑傳附載王世貞傳中是集
前三卷皆詩後三卷爲雜文當嘉隆之際李攀龍
王世貞方負盛名而裳與南昌余曰德德甫銅梁
張佳允肖甫新蔡張九一助甫實左右之當時稱
爲四甫裳才地稍弱尤爲墨守不變集首佳允序
謂其文非左國兩司馬詩非建安大厯則不以寓
目此卽其力持王李餘論之證故世貞藝苑卮言

亦稱其不失門宗云

大雅堂摘藁

無卷數 江西巡撫探進本

明況叔祺撰叔祺有考古詞綜已著錄是集千頃堂書目不載江西通志亦稱是時王李之學盛行有後五子廣五子等目而不及叔祺大雅堂集世亦罕有傳者則明代已不行於世矣此本題云摘藁則尙非叔祺之全集詩止近體無古體叔祺尤不應若是之陋或選錄者不諳古體惟取其所能解耶

居來山房集六十五卷

江蘇巡撫
採進本

明張佳允撰佳允字肖甫銅梁人初號壚山以其

家在居來兩山之間更號居來山人

案居來一作
峴嶽蓋字之

別體嘉靖庚戌進士官至兵部尙書總督薊遼事迹

具明史本傳佳允爲郎時與王世貞諸人相酬和

七子仕宦多不達而佳允鎮雄邊定大變以功名

始終論者謂其詩文才氣縱橫而頗乏深致蓋雄

心大畧不耐研思於字句間也是集賦一卷詩二

十八卷雜文三十五卷末一卷附錄行狀墓誌後

又載同時諸人所作序記等文十一篇

天目山堂集二十卷附錄一卷

兩淮鹽政
採進本

明徐中行撰中行字子與號龍灣長興人讀書天目山下故自稱天目山人嘉靖庚戌進士官至江西左右布政使明史文苑傳附見李攀龍傳中中行爲後七子之一王世貞藝苑卮言亟稱之以爲左準右繩靡所不合胡應麟詩藪則惜其少沈深之致陳子龍明詩選復有摹古太似之譏是非恩怨輾轉相爭要之或褒或貶各有所當合而觀之則

中行之定評出矣雜文亦有意矯揉頗失渾雅蓋
當時風尚七子同一軌轍非如是不能預壇坫也

青蘿館詩六卷

兩江總督
採進本

明徐中行撰是集乃隆慶中其壻汪時元所刻其
守汝寧以後之詩居三分之二汰其古文又汰其
少作較全集爲精簡然中行於北地之學漸染既
深時元能刪其枝蔓不能變其根柢也

余德甫集十四卷

江蘇周厚
堉家藏本

明余曰德撰曰德初名應舉字德甫南昌人嘉靖

庚戌進士官至福建按察司副使明史文苑傳附
見王世貞傳中與魏裳注道昆張佳允張九一所
謂嘉靖後五子也世貞稱其詩古近體亡所不佳
近體獨超近體五七言亡所不超七言獨妙靜志
居詩話則謂其詩尙未見門戶元美冠諸後五子
之首未免阿其所好今觀是集彙尊所論公矣

豐陽集十二卷

浙江巡撫
採進本

明馮臯謨撰臯謨字明卿海鹽人嘉靖庚戌進士
官至福建布政司參政是集凡詩四卷文八卷臯

謨在粵平大盜張璉擊敗倭寇皆有功又創議立
條鞭投櫃之法至今稱便其經濟頗可觀而詩文
則但有浮聲殊乏切響許聞造行狀稱臯謨官刑
部時與梁有譽宗臣吳國倫徐中行相善切劘爲
詩故其趨向亦相近云

來薇集四卷幽貞集二卷邕歛集六卷

兩江總督
採進本

明董傳策撰傳策有奏疏輯畧已著錄此三集乃
傳策以嘉靖戊午遣戍至隆慶丁卯召還前後十
年之詩也采薇集爲四言樂府歌行絕句等體幽

貞集爲五言古體邕歛集爲七言律體詩多激烈
如其爲人案千頃堂書目采薇集作十四卷幽貞
集作十一卷邕歛集作七卷與此互異明人集多
隨作隨刊卷帙無定未知爲此本不完或黃虞稷
誤載又有廓然子藁二卷蘧廬藁七卷此本不載
殆偶佚矣

甌甌洞藁五十四卷續藁二十七卷

山東巡撫
採進本

明吳國倫撰國倫有陳張本末畧已著錄初國倫
爲兵科給事中時以倡衆賄楊繼盛忤嚴嵩左遷

世稱其義在後七子中最爲老壽初與王世貞李攀龍唱和後與李維禎汪道昆輩狎主詩盟其著述頗富然在當時胡元瑞作詩藪已譏其用句多同一篇而外不耐多讀

國朝朱彝尊靜志居詩話亦謂王李旣沒觚甄幾與四部爭富而海內之爲真詩者寡則文章不逮其行誼矣此觚甄洞藁國倫所手定續藁則其子士良所校刻明史藝文志此二集外又載其詩藁十五卷今未之見意亦散佚歟

蘇山集二十卷

兩淮鹽政
採進本

明陳柏撰柏字子堅一字憲卿沔陽人嘉靖庚戌進士官至井陘兵備副使是集凡詩十卷文十卷詩頗宕逸有姿而失於薄弱文又不及其詩千頃堂書目別載柏見南山集八卷不載此集殆偶未見也

蘇山選集七卷

浙江巡撫
採進本

明陳栢撰是集爲莆田黃謙所選定凡詩四卷文三卷千頃堂書目作五卷傳寫誤也

小漁遺藁十二卷

浙江巡撫
採進本

明唐汝楫撰汝楫字思濟蘭谿人吏部尙書龍之子龍號漁石故汝楫自號小漁嘉靖庚戌進士第一官至左春坊左諭德事迹附見明史龍傳史稱龍與嚴嵩相善汝楫又以素附嵩得第一人及第後坐嵩黨奪官則其人不足重其文章亦不爲世所稱是集爲萬厯乙卯蘭谿知縣莊起元所編皆應俗之文起元稱其著作甚夥散佚不傳僅從其孫宗本曾孫明照索得殘藁就而編次云

春明藁十四卷

浙江汪汝璥家藏本

明徐學謨撰學謨有春秋億已著錄是編皆其以
尚書召起再入都時所作故以春明爲名凡文編
十卷詩編三卷續編一卷文編末四卷爲齊語皆
所著雜說千頃堂書目作八卷蓋除齊語計之也
其論詩一條云近來作者綴成數十艷語如黃金
白雪紫氣中原居庸碣石之類不顧本題應否強
以竄入專愚聾瞽自以爲前無古人小兒效顰引
爲同調南北傳染終作癘風詩道幾絕其語蓋爲

王李而發學謨與王世貞里閭相近而立論如此頗不爲習俗所染然詩多懦響終不能副所言也

徐氏海隅集四十卷

浙江孫仰曾家藏本

明徐學謨撰明史藝文志載學謨文集四十三卷千頃堂書目亦載學謨海隅集四十三卷此本僅四十卷前無序目蓋姦黠書賈以殘缺之本割去序冒爲完書也開卷卽列寶殿玉芝諸頌蓋當時風氣類然至其書易名始末一篇與世傳學謨初名學詩以其時有上虞徐學詩疏劾嚴嵩懼以

同名罹禍故改名學謨者說又不同蓋莫得而詳焉

歸有園藁二十九卷

江西巡撫採進本

明徐學謨撰是集文二十二卷詩七卷乃其歸田後所作學謨嘗謂昔人有云近世士夫以官爲家罷則無所於歸故自早歲罷荊州守卽構一園名曰歸有因以名其詩文中多酬應之筆其雜著中塵諸鏡戒二卷尤未免失之於俚

留餘堂集四卷

浙江巡撫採進本

明潘季馴撰季馴平生功業著於汴河所作河防一覽已著錄是集詩一卷文三卷皆無所見長干頌堂書目作五卷此其尙佚一卷歟

李溫陵集二十卷

江蘇周厚堉家藏本

明李贄撰贄有九正易因已著錄是集一卷至十三卷爲答書雜述卽焚書也十四卷至十七卷爲讀史卽摘錄藏書史論也十八十九二卷爲道原錄卽說書也第二十卷則以所爲之詩終焉前有自序蓋因刻說書而併摘焚書藏書合爲此集也

贊非聖無法敢爲異論雖以妖言逮治懼而自剄
而焦竑等盛相推重頗熒衆聽遂使鄉塾陋儒翕
然尊信至今爲人心風俗之害故其人可誅其書
可燬而仍存其目以明正其爲名教之罪人誣民
之邪說庶無識之士不至怵於虛名而受其簧鼓
是亦彰燿之義也

周禹川集五卷

直隸總督
採進本

明周大章撰大章字章之號禹川吳江人嘉靖壬
子舉人官至瑞安縣知縣是編爲文藝集二卷皆

所作雜文禦倭武畧三卷前二卷載防倭方畧後一卷附錄投贈詩文嘉靖中江以南屢被倭寇大章以書生佐守吏調兵食所至克捷鄉里實受其利然平生本不以文章名其禦倭武畧中多載公移劄付之類尤爲叢雜

羽王先生集畧

無卷數 兩江總督採進本

明張鳴鳳撰鳴鳳有桂故已著錄是集爲僧超撥所刻超撥卽鳴鳳之孫也自稱家遺鏤集七種值兵火幸存因從全藁內錄其十分之二付之剞劂

然桂故等三書亦在其內惟詩文集及酒書八論
世無別行之本而超撥刪削無識徃徃去其菁華
舉其蕭艾已非復鳴鳳之舊矣

子相文選五卷

江西巡撫
採進本

明宗臣撰臣有宗子相集已著錄是編止詩一卷
文四卷爲鄭二陽所選評姜承宗姜繼宗所編輯
於集外別行者也

九愚山房詩集十三卷

山西巡撫
採進本

明何東序撰東序字崇教號肖山猗氏人嘉靖癸

丑進士官至右僉都御史巡撫延綏其詩未能入
格而尤喜作古樂府凡郭茂倩樂府詩集古題擬
之幾遍甚至郊廟樂章亦仿爲之然唐人已不能
擬漢魏而東序欲爲唐人所不能不亦難乎

惺堂文集十四卷

江西巡撫
採進本

明史桂芳撰桂芳字景實號惺堂鄱陽人嘉靖癸
丑進士官至兩浙鹽運使桂芳與羅汝芳耿定向
講學其語錄稱誦陳獻章未分無極源頭在誰畫
先天樣子來碧玉樓中間隱几十千山繞又川廻

之句謂數十年不似今夕了悟其宗旨可見而文章頗朴實不爲虛渺之談集末附書經補說三卷多與先儒立異其謂周武王無封箕子事說亦甚辯然史傳炳然古無異論安可懸斷其誣也

曹太史含齋集十六卷

浙江孫仰曾家藏本

明曹大章撰大章字一呈號含齋金壇人嘉靖癸丑進士官翰林院編修以廢疾罷是集凡文十三卷詩三卷多慶祝哀輓之篇應試策論亦悉載焉

姜鳳阿文集三十八卷

江西巡撫採進本

明姜寶撰寶有周易傳義補疑已著錄是集分十
藁初藁一卷中秘藁一卷讀禮藁一卷史館藁三
卷西川藁二卷周南藁一卷八閩藁二卷銀臺藁
二卷南雍藁二卷家居藁十一卷留部藁十一卷
寶少從學於唐順之其行文步驟開闔頗得力於
師說而學力根柢不及順之之深厚故論明代之
文者不及焉王世貞序謂宏正而後士大夫禍檀
左而鼎先秦乃其流弊而爲似龍出之無所自施
之無所當六季之習巧者猴棘端侈者繡土木而

極推寶之學爲能深造自得蓋世貞晚年亦深厭
字剽句竊之病而折服於歸有光諸人故其說如
此也

虛籟集十四卷

湖南巡撫
探進本

明劉堯誨撰堯誨號凝齋臨武人嘉靖癸丑進士
官至南京兵部尙書是集爲其六世孫心忠所編
凡文九卷詩五卷詞三首偈四首共爲一卷其論
性論格物頗拾姚江緒餘書啟序記中皆贈答應
酬之作標題多稱父母郡祖都臺乃堂之類亦頗

嫌太質

綠波樓詩集十四卷

河南巡撫
採進本

明張九一撰九一字助甫號周田新蔡人嘉靖癸丑進士官至右僉都御史巡撫寧夏明史文苑傳附見王世貞傳中世貞詩亦謂吾黨有三甫蓋余曰德字德甫張佳允字肖甫與九一字助甫爲三甫也

案此與四甫之說不同蓋作詩之時魏裳猶未入社也

論者謂其詩高

華雄爽振宕不羈於七子齊盟風氣雷同之時自稱拔俗然今觀其集實未能於七子之外別開門

徑蓋九一服膺王世貞曾因世貞父忬故觸忤嚴
嵩遭遷謫而不悔卽其生平規撫可知矣九一官
湖廣參議時嘗構綠波樓後遂以名其集舊板已
燬此本

國朝康熙中新蔡知縣呂民服所重鋟也

學孔精言舍彙纂十二卷

兩江總督
採進本

明孫應龍撰應龍有淮海易談已著錄明史藝文
志載應龍彙纂十六卷此本十二卷前有萬厯己
卯劉伯燮序言集首奏疏終於古風絕律今第十

二卷止於五言律詩而絕句七言律詩皆闕知非足本矣

百可亭摘藁九卷

浙江巡撫採進本

明龐尙鵬撰尙鵬字少南南海人嘉靖癸丑進士官至副都御史巡撫福建天啟初追謚惠敏事迹具明史本傳是集奏疏四卷襍文三卷詩二卷凡分三編千頃堂書目作三卷蓋僅據其襍文一種也詩文皆朴實惟奏議頗爲明暢其與張居正小簡尤切直居正復書附焉蓋論萬厯四年九月居

正奪情事也史稱居正深銜之嘆吏科給事中陳
三謨以給由歲月有誤劾之遂罷去家居四年而
卒云

石泉山房文集十卷

江西巡撫
採進本

明郭汝霖撰汝霖字時望號一厓永豐人嘉靖癸
丑進士官至南京太常寺卿汝霖從鄒守益歐陽
德諸人講學故其議論與羅汝芳一派相近古詩
頗規模陳子昂李白諸人得其形似近體則又次
焉

李子田文集四卷

兩江總督
探進本

明李蔡撰蔡有黃谷瑣談已著錄所選宋元藝圃
集頗有別裁而文章沿厯城太倉之派未能自闢
門庭其持論務合儒釋爲一遂併孟子而非之如
曰孟子非排告子也排告子而自異於孔氏諸聖
人也諸儒非尊孟氏也尊孟子而自別於孔氏諸
聖人也可云大紕繆矣

近溪子文集五卷

江蘇巡撫
探進本

明羅汝芳撰汝芳有孝經宗旨已著錄其學出於

顏鈞承姚江之末流而極於泛濫故其說放誕自如敢爲高論著述最易成編多至四五十種卽其集亦非一刻有近溪子集其門人杜應奎編有近溪子全集其孫懷祖刊有批點近溪子集耿定向所編有批點近溪子續集楊起元所編有明德公文集近溪先生全詩集近溪子附集近溪子外編有從姑山集續集並其孫懷智所編有明德詩集其門人左宗郢刊今多散佚此集則其曾孫萬先所刊也

愧非集十四卷

山東廵撫
採進本

明馬攀龍撰攀龍字冲霄號愧非子陽信人嘉靖
己卯舉人官禮部主事是編凡談畧四卷乾坤逆
旅集一卷漫藁一卷遊涉藁一卷遊林藁一卷邯
鄲學步集四卷忙忙亭藁二卷明詩綜稱其博學
雄才著述甚富惜年不稱壽今以集考之攀龍爲
學官時有院試詩云五十老文學低頭竊自羞自
注云余赴試許州自傷老大猶滯學博云云其後
遷邯鄲令轉京邑入爲主事有早春入朝句云書

生慶際遇白首得爲郎又長安除夕有爲客已三
載壯志灰頽齡等句則年不稱壽之說非也談畧
所引多小說俚語詩用洪武正韻又與詩餘雜編
亦乖體例

震堂集六卷

江蘇巡撫
探進本

明王養端撰養端字茂成遂昌人嘉靖乙卯舉人
是集爲其鄉人何鏜所刪定而遂昌知縣池明刻
之其時王李並馳海內響應故養端所作亦沿二
家之波大都一字一句必似古人而意趣則罕所

自得冠以擬古樂府一卷望其標目古色斑然核
其文章乃多無取如李延年歌漢武帝李夫人歌
皆偶爾神來遂成絕調卽作者亦不能再爲而皆
衍爲長篇味如嚼蠟焦仲卿妻詩木蘭詩正以委
曲瑣屑入妙而縮爲數句又似斷鳧至於樂府諸
篇古詞僅在如曰摹其音節則無詔伶人事謝絲
管劉勰言之矣非夔非曠誰能於千百年後得其
律呂如曰闡其意義則標名旣每難詳詞句尤多
訛闕吳兢所解已多在影響之間今安得知其本

旨鈞竿朱鷺之類尙可緣題成文至東光翁離諸
篇題旣不明詞又不解一概描摹不已實不知何
所見而云然矣

潛學藁十二卷

浙江巡撫
採進本

明鄧元錫撰元錫有三禮釋已著錄此其所作禊
文及語錄也其語錄力闡心學在當時尙爲篤實
文章則頗爲朴儻未足擅長

耿天臺文集二十卷

湖北巡撫
採進本

明耿定向撰定向有碩輔寶鑑要覽已著錄是集

爲其門人劉元卿所編凡詩賦一卷雜文十九卷
末一卷爲時藝蓋用宋文鑑收張才叔經義例也
定向之學歸宿在王守仁故集中第十三卷以薛
瑄諸人爲列傳而以守仁爲世家此蓋陰用史記
孔子世家之例不但以守仁封新建伯也黃宗羲
明儒學案列之泰州王艮派下摘其與張居正論
趙用賢吳中行等書以爲雖欲少殺其禍亦近於
誦六藝以文姦言又摘其劾御史王藩臣疏以爲
鉗制言官考與居正書在第六卷中核其詞意蓋

求寬言者之罰不得不先解居正之怒求解其怒不得不先順其意而使之喜於是借伊尹之任以

獻諛頌遂爲天下口實

案明史定向本傳稱居正奪情定向貽書友人譽爲

伊尹而貶言者時議嘗之蓋偶未檢此糾王藩臣集誤以與居正爲與友人謹附識於此

疏今在第二卷中大旨愠藩臣劾巡撫周繼未以揭帖送都御史使藩臣所劾不實定向糾其妄奏可也乃因遺誤送揭閱一月之後始糾其不實此爭私憤非爭公論矣顧允成作客問以詰定向定向不能答厥有由歟大抵定向之學兼講作用觀

其全集大畧可知宗義所論要不可謂之無因也

濟美堂集八卷

福建巡撫
探進本

明吳文華撰文華有粵西疏藁已著錄是集凡詩
文四卷頗沿臺閣舊體後四卷卽粵西奏議及留
都奏議其初別本各行後又編入集中也

屏居集八卷浪游集六卷耕餘集八卷

江蘇巡撫
探進本

明姚汝循撰汝循字叙卿江寧人嘉靖丙辰進士
官至大名府知府終於嘉州知州汝循自大名罷
官歸田著屏居集及嘉州罷後厯遊燕趙楚蜀間

著浪遊集晚年退耕秦淮著耕餘集王穉登序其耕餘集謂其冲若陶韋然陶韋不在其貌也

濟美堂集六卷

浙江巡撫
採進本

明陳瓚撰案世宗時有兩陳瓚其一獻縣人嘉靖丁未進士官至南京吏部尙書卽嘗爲楊繼盛奏請卹典者此陳瓚字廷裸常熟人嘉靖丙辰進士官至刑部左侍郎謚莊靖事迹附見明史魏時亮傳是編首列疏一卷詞頗伉直餘多酬應之文六卷之末附詩二十八首詞一首亦非所長

蘭暉堂集四卷

浙江汪汝璥家藏本

明屠應竣撰應竣字文升刑部尙書勲之子嘉靖丙辰進士官至左春坊左諭德明史文苑傳附載王慎中傳中應竣爲文善比事屬辭詩法汎濫諸家時有獨造一時名出其父右然牽於華藻蘊蓄未深是編凡詩二卷文二卷與其父集本別行後其曾孫繩德等又取勲所著太和堂集與是集合刻名曰屠氏家藏二集云

怡雲堂集十卷

江西廵撫採進本

明蔡國珍撰國珍字汝聘奉新人嘉靖丙辰進士官至吏部尚書謚恭靖事迹具明史本傳是集乃其從曾孫尚才所編凡詩四卷文六卷詩皆近體尚才序謂從敗簏中得其歸田後所作詩一帙分類編次蓋非全藁也卷四後附其子若孫之詩卷五卷六乃國珍所作奏疏叙記諸文又卷七卷八附以敕命墓表及壽文祭文卷九又爲國珍所作書啟小詞卷十又附刻他人書啟編次殊爲無緒且詩實四卷而序云二卷尤爲不檢矣

心泉集二十五卷

浙江孫仰曾家藏本

明何源撰源字仲深號心泉江西廣昌人嘉靖己未進士官至刑部左侍郎謚靖惠源官吏部文選司主事時張居正以親故託之拒弗應緣是引疾歸及爲南京吏部侍郎京察黜陟公允爲海瑞所稱以爲士人致身報主當如是後卒於官貧幾不能殮蓋以氣節自負者是集爲其子孔賢孔賓所編凡文二十二卷詩賦歌詞三卷大抵非公牘卽應酬之作然源之足以不朽者固不在此也

張許東集十四卷

河南巡撫
探進本

明張鹵撰鹵字召和號許東儀封人嘉靖己未進
士官至右副都御史巡撫保定以忤張居正馮保
左遷南京太常寺卿旋乞休歸終於家是集所載
詩六卷文八卷初刻於天啟五年爲其子永忠及
門人王安仁所訂定板久燬此本爲其後人重刊
其中如慶成宴代巡贈別諸作本五言長律而襍
之古體中題鹿鳴宴圖本七言古詩而列之詞內
編次頗爲舛誤且考鹵在諫垣時陳奏頗爲侃直

其後三領節鉞能殲叛卒修邊備與中朝權貴相
抗多有政績可紀而集中章疏乃無一篇意者尙
別有奏議自爲一集乎

華陽洞藁二十二卷

兩江總督
採進本

明張祥鸞撰祥鸞字道卿別號虛齋金壇人嘉靖
己未進士官至雲南府知府是編文十三卷詩九
卷祥鸞多與嘉靖七子相往還而詩能不涉其窠
臼然所造則尙未深也

王奉常集六十九卷

江蘇周厚
堉家藏本

明王世懋撰世懋有却金傳已著錄是集賦詩詞
十五卷文五十四卷第五十二卷曰澹思子第五
十三卷曰藝圃擷餘第五十四卷曰經子臆解易
爻解皆所作襍說筆記附編集內者也世懋名亞
於其兄世貞而澹於聲氣持論較世貞爲謹嚴厥
後藝苑卮言爲世口實而藝圃擷餘論者乃無異
議高明沉潛之別也但天姿學力皆不及世貞故
所作未能相抗耳朱彞尊靜志居詩話云敬美才
雖不逮哲昆習氣猶未陷溺斯持平之論也

關洛記游藁二卷

兩淮鹽政
採進本

明王世懋撰是集乃萬厯辛巳世懋官陝西提學副使旋以疊陽子事爲臺諫所彈乃移疾自洛陽東歸時作上卷游記三篇下卷詩七十七首屠隆爲之序亦全作二氏支離語蓋一時士大夫習氣如斯也

賜閒堂集四十卷

兩淮鹽政
採進本

明申時行撰時行有書經講義會編已著錄是集賦詩共六卷文及禠著共三十四卷其相業無咎

無譽詩文亦如其爲人

王文肅集五十二卷附錄二卷

檢討蕭芝家藏本

明王錫爵撰錫爵有王文肅奏草已著錄是集爲其孫時敏所編凡禠文十二卷書十八卷奏疏二十二卷附載榮哀錄一卷誌狀碑傳一卷前有申時行序然時行乃序其奏疏非序其全集時敏刊刻之時取以冠編耳時敏跋稱彙集文藁不能十之五六詩藁經年廣搜未能成帙又稱入閣以後叅軍代筆奉有先命不敢混入云

觀我堂摘藁十二卷

安徽巡撫
採進本

明李材撰材有李見羅書已著錄其學出於姚江而稍變其說遂開止修一派與良知一派並傳然制行頗率意自恣官巡撫時毀叅將署爲書院致激兵變後雲南巡按御史劾其破蠻冒功逮問坐繫十餘年謫戍福建乃仍用巡撫儀從以往爲當時所怪黃宗羲明儒學案謂其以師道自任不因患難而改不知者謂其不忘開府門面則失之然師道尊嚴豈在鼓吹張蓋宗羲以姚江一派門戶

相同從而爲之曲說耳是集凡大學古本義一卷
書問十卷襍著一卷皆其講學之文也

敬和堂集八卷

浙江巡撫
採進本

明許孚遠撰孚遠字孟中德清人嘉靖壬戌進士
官至兵部左侍郎事迹具明史儒林傳孚遠之學
雖出於唐樞然史稱其篤信良知而惡夫援良知
以入佛者故與羅汝芳楊起元周汝登斷斷相爭
在姚江末派之中最爲篤實馮從吾劉宗周丁元
薦傳其所學皆能有所樹立是集前有葉向高序

蓋萬厯甲午孚遠爲福建巡撫時所刊每卷之首
尙空其次第未鐫以板心號數計之凡序一卷記
一卷襍著一卷書一卷疏二卷公移二卷云

衛陽集十四卷

直隸總督
採進本

明周世選撰世選字文賢故城人嘉靖壬戌進士
官至南京兵部尙書是集以衛陽爲名蓋故城在
衛河之陽世選以自號因以名集也世選以風節
著文章非所留意然集中章奏如諫穆宗馳馬於
禁掖神宗講武於宮中皆不知明之積弱由於朝

廷之宴安朝廷之宴安由於諸帝之不知兵事持
論殊爲迂闊又姚希孟序謂大學士高拱構禍華
亭將引世選劾指臂弗應遂被逐去復引其祭拱
文中隱顯參商語以證之然世選出拱之門不受
指喉具見特立之操乃拱既卒而必特彰其事於
祭文是又不如置之不辨之爲厚矣

海亭集四卷

福建巡撫
採進本

明鄭普撰普字汝德海亭其號也南安人嘉靖壬
戌進士官至雲南府知府是集文三卷皆應酬之

作詩一卷僅二十餘首亦殊寥寥據王慎中所作墓志謂普精於經學觀集中復林次崖二書亦憑虛理斷之學非原原本本之學也

覆瓿草六卷

浙江汪汝璥家藏本

明林涇撰涇字貞耀閩縣人嘉靖壬戌進士官至南京工部尙書事迹附見明史林瀚傳集首有王穉登序言涇官未踰藩鎮旣告歸幾二十年乃以薦爲太僕俄復請歸與史不合蓋史舉其所終之官穉登所稱則其刻集時官也穉登序極論七子

末流之弊而獨稱經詩爲有道之言然是集爲胡應麟所編應麟故依附七子者集中所錄大抵舊調居多新意殊少仍七子之支派而已

逍遙園集二十卷

江蘇周厚堉家藏本

明穆文熙撰文熙有七雄策纂已著錄是集爲南師仲所編凡詩十卷文十卷明史藝文志作逍遙園集十卷疑刊本誤脫二字也

處實堂集八卷

江蘇周厚堉家藏本

明張鳳翼撰鳳翼有夢占類考已著錄是編詩四

卷文三卷末一卷曰談略則其筆記也鳳翼才氣
亞於其弟獻翼故不似獻翼之狂誕而詞采亦復
少遜生平好填詞集中多論傳奇之語千頃堂書
目載鳳翼處實堂前集十二卷後集六卷與此本
皆不符未喻其故

支起堂集十卷

兩淮馬裕
家藏本

明張獻翼撰獻翼有讀易紀聞已著錄是集凡賦
一卷詩六卷禠文三卷其詩文多參以俳偶蓋獻
翼雖頗與李攀龍筆札往還而與皇甫湜尤契故

學其含咀魏晉而未能成家云

純綺集一卷

安徽巡撫
採進本

明張獻翼撰乃自錄其早歲所作於文起堂集外
別行者也

狎鷗子摘藁一卷

江西巡撫
採進本

明吳崇節撰崇節有古史要評已著錄此其爲武
岡知縣罷歸後所爲文也前有狎鷗亭賦及霞堦
八景絕句後則禰文寥寥僅十數篇皆詞意淺薄
中有悟遠生傳詳其詞意乃崇節自謂而其狎鷗

亭賦又自稱豫石子隨地易號殆仿元結之例歟

魯望集十二卷

兩淮馬裕
家藏本

明袁尊尼撰尊尼字魯望吳縣人僉事表之子嘉靖乙丑進士官至山東提學副使是集純爲七子之體故王世貞序極稱之

天池草二十六卷

編修吳典
家藏本

明王宏誨撰宏誨字紹傳瓊州安定人嘉靖乙丑進士官至南京禮部尙書宏誨初釋褐時值海瑞廷杖下詔獄力調護之張居正當國又嘗作火樹

篇春雪歌以諷爲居正所銜蓋亦介特之士也是
集文二十卷詩六卷集首載諭祭文及本傳猶古
人附錄之例又載其三世誥命已爲破格至以萬
厯己丑宏誨爲會試副總裁遂并載是科題名錄
則從來編別集者無此變體矣

謝山存藁十卷

江蘇巡撫
採進本

明陳吾德撰吾德字有齋廣東新會人嘉靖乙丑
進士官至浙江按察司僉事吾德傳陳獻章之學
居官忤張居正屢遭貶謫其氣節亦錚錚者詩文

則直述胷臆而已

震川文集初本三十二卷

安徽巡撫
採進本

明歸有光撰有光有易經淵旨已著錄是編爲其
子子祐子寧所輯前有萬厯三年周詩序所謂崑
山本者是也其中漏畧尙多故其曾孫莊又裒輯
爲四十卷而有光之文始全相傳子寧改竄父書
有光見夢於賈人童姓其事雖不足信而字句之
訛舛誠有如莊所指摘者末載行述一篇子祐所
作又序畧一篇子寧所作也

二西園詩集十二卷文集十四卷續集二十三卷

湖北巡撫

採進本

明陳文燭撰文燭字玉叔沔陽人嘉靖乙丑進士官至南京大理寺卿其詩分八集曰漢陰詩曰廷中詩曰淮上詩曰嵩和詩曰西蜀詩曰東岱詩曰金焦詩曰黃蓬詩陳思育王喬桂皇甫汈袁福徵黃省曾沈明臣李先芳孫斯億任瀚高啟愚熊敦朴陳宗虞曾可耕吳國倫方沆黃一正李維楨屠隆周光鎬十九人序之文曰五岳山人前集五岳

山人後集王世貞歸有光汪道昆茅坤序之後總
編爲二西園文集道昆世貞又序之續集則文燭
身後其孫之邁所輯皆文無詩亦無當時名士序
惟之邁自序之又與文燭之壻龍膺各爲一跋而
已斯亦生死之際交遊盛衰之驗而文壇標榜其
不足盡據可知矣

楊端潔集

無卷數 江西
巡撫探進本

明楊時喬撰時喬有周易古今文全書已著錄是
集爲其子聖踐所編江右之學惟時喬一本程朱

故集中大學周易諸序及孔朱二像碑皆力闢心學之誤云

洪洲類藁四卷

浙江汪啟淑家藏本

明王圻撰圻有東吳水利考已著錄是集凡詩一卷文三卷乃其提學湖廣時所自編其孫謨又爲重刻圻所著述如續文獻通考三才圖會碑史類編諸書皆篇帙浩繁動至一二百卷雖龐襍割裂利鈍互陳其採輯編排用力亦云勤篤計其平日殆無時不考古研今其於詩文殆以餘事視之故

寥寥如此存而不論可矣

寶善堂藁二卷

兩淮鹽政
採進本

舊本題慶成王宗川撰不著其名考明史晉王櫟
第四子濟炫封慶成王其子孫襲封者無宗川之
名集中孔天允序稱王纂世十葉趙訥跋亦云王
祖考安穆王以世次推之宗川蓋卽榮懿王慎鍾
之號穆文熙詩話稱榮懿王以賢孝稱器質敦厚
詩亦有體裁足相證也然明詩綜載有慎鍾夏曰
登萬佛樓次朱使君韻詩一首而此集中不載則

又未詳其故矣

山居集八卷

浙江范懋柱家天一閣藏本

明栗應宏撰應宏字道甫長子人嘉靖中舉人屢試不第耕讀太行山中祥符高叔嗣謝病歸應宏往與訂交叔嗣作紫團山人歌贈之是集卽叔嗣所序也集中惟五言近體頗有隱秀之致餘體則自卽無譏千頃堂書目載是集作六卷疑字之誤又載有太行集十六卷今未見傳本

吾野漫筆十三卷

浙江巡撫採進本

明許炯撰炯字吾野新會人嘉靖中舉人是集凡
文七卷詩六卷前有自序謂少時不慧從羣兒騎
竹馬粘蜻蜓捕鳥雀爲戲未幾病姑忽劇夢一父
老出袖中書授之俄墜而覺自是遂能把筆作詩
其一卷首篇述戒稱有通元先生過而誨之云云
蓋才高而無所師法者故其漫書各篇內謂范仲
淹揚雄之流也胥於僭矣蘇洵荀卿之流也鄰於
詐矣又謂蘇洵辯姦訾安石也吾以爲洵亦安石
之徒云云皆率意一往不復繫以規矩者也

俞仲蔚集二十四卷

浙江汪汝璠家藏本

明俞允文撰允文初名允執仲蔚其字也崑山人嘉靖中諸生年四十卽棄去舉子業一意爲詩明史文苑傳附載王穉登傳中允文與王世貞善故與盧柟李先芳吳維岳區大任世貞目爲廣五子然允文論詩乃深不滿李攀龍特才地差弱終不能與之抗衡耳大抵廣五子中柟最挺出大任次之先芳維岳及允文又其次也

天隱子遺藁十七卷

浙江巡撫採進本

明嚴果撰果字毅之震澤人嘉靖時布衣是集詩
七卷文十卷首有王思任序云弇州盱衡海內才
子俱上贄貢所不能致者會稽徐文長臨川湯若
士其鄉則嚴毅之可謂卓然自立之士然其詩文
則尙非徐渭湯顯祖之匹

汪山人集十八卷

浙江孫仰
曾家藏本

明汪少廉撰少廉字古矜休寧人嘉靖中布衣其
集第一卷爲賦二卷至十六卷爲詩末二卷爲襍
文詩於分體中又各分類名目繁細每類中又注

編年於其下叢碎彌甚所作音節高亢而神理不具徃徃失之蹈襲其邊憤一詩朱熹尊明詩綜獨取之然究不出少陵諸將蹊徑也

大鄣山人集五十三卷

安徽巡撫探進本

明吳子玉撰子玉字瑞穀休寧人嘉靖中貢生其文規撫李攀龍集中分體二十皆以某部爲題其叙事志畧說譜等目並出臆造

何翰林集二十二卷

兩淮鹽政探進本

明何良俊撰良俊有四友齋叢說已著錄是集乃

其詩文襍著並語林之小序亦載焉朱葵尊明詩
綜載其有清森閣集千頃堂書目載良俊清森閣
集無卷數又載其柘湖集二十八卷據集首莫如
忠序稱是集二十八卷蓋卽所謂柘湖集者此本
僅二十二卷目錄亦復殘缺則已非完書矣良俊
在當時頗有文名所作縱橫跌宕亦時有六朝遺
意而落筆微傷太快殆亦才人輕脫之習歟

芸暉館藁十三卷

浙江巡撫
採進本

明茅翁積撰翁積字穉延歸安人副使坤之子也

豪蕩不羈以任俠自負故所作多文酒醺會之詞
是集凡詩十卷文二卷樂府二卷而以行狀墓誌
銘小傳附其後

鬼園草六卷

江蘇巡撫
探進本

明曹乾學撰乾學字叔驥太倉人與王世貞爲姻
家又與趙宦光輩友善故集中多遊覽酬贈之作
其詩不盡落婁東窠臼然邊幅窘束則才地限之
也

黃說仲詩草十八卷

浙江孫仰
曾家藏本

明黃惟楫撰惟楫字說仲天台人其詩多與王世貞區大任等唱酬之作蓋亦沿七子之流波者

被褐先生藁十七卷

江蘇巡撫採進本

明華善述撰善述字仲達無錫人是集惟末一卷爲襍文餘卷皆詩也王世貞爲作序云其詩或并比興而忘之大槩不可爲典要是深不滿之矣

童子鳴集六卷

浙江汪汝璩家藏本

明童佩撰佩字子鳴龍游人世爲書賈佩獨以詩文遊公卿間嘗受業於歸有光其歿也王世貞爲

作傳王穉登爲作墓誌蓋亦宋陳起之流也詩格
清越不失古音而時有累句如讀李博士集繞屋
梅花然句蓋用沈約詩山櫻紅欲然語以之品梅
殊不類又如觀魏知古告身歌高齋試展竹滿牆
句上四字下三字邈不相貫他如囊琴挾水流客
鬢帶山蒼之類皆失之纖巧公牘無盈案私錢不
入囊之類皆失之拙俚川原呈伎倆之類尤失之
儼佻舊序稱其閉戶屬草必屢易而後出出則使
人彈射其疵徃徃未愜併其藁削之不留一字殊

不盡然也

松韻堂集十二卷

浙江孫仰曾家藏本

明孫七政撰七政字齊之常熟人與王世貞諸人遊故爲詩亦類七子之體而字句時傷於笨滯

王世周集二十卷

江蘇巡撫探進本

明王伯稠撰伯稠字世周崑山人是集卷首有王世貞兄弟序頗相推許然攷其所作似過於標榜

壯遊編三卷

浙江巡撫探進本

明王叔承撰叔承初名光允以字行更字承父晚

更字子幻自號崑崙山人吳江人明史文苑傳附
載王穉登傳中叔承早棄舉子業縱遊齊魯燕趙
又入閩入楚其在鄴下鄭若庸薦之趙康王叔承
以王無下士實意賦詩以行有壯心欲別逢知己
羞向侯門待晚餐之句又客大學士李春芳家亦
以使酒偃蹇謝去史稱其與王錫爵爲布衣交錫
爵再召時有建三王並封議者叔承遺書數千言
謂當引大義以去就爭不當依違兩端負主恩辜
物望其所懷抱亦非當時山人墨客以詩句爲市

者比最後從顧養謙於塞上無所成就而歸乃不復出此集卽其初入都時作也

吳越游八卷

浙江孫仰曾家藏本

明王叔承撰是集前六卷爲詩無錫陳以忠所刻後二卷爲襍文烏程范應期所刻千頃堂書目作十卷與此本不合或字悞歟

涉江詩選七卷

浙江孫仰曾家藏本

明潘之恒撰之恒有黃海已著錄之恒初以文詞受知於汪道昆王世貞旣而赴公車不得志渡江

歷潯陽武昌從公安袁宏道兄弟游宏道稱其出
汪王之門而能不入其蹊徑然當時論者又謂之
恒依傍汪王終不能有所解駁宏道徒以其論與
已合而收之迹其生平蓋始終隨人作計者也集
本二十卷宏道刪定爲此本凡甲乙集各三卷丙
集一卷

麥麥集四十卷

浙江孫仰曾家藏本

明俞安期撰安期有唐類函已著錄是集騷一卷
賦二卷詩二十七卷禠文一卷安期之名本由依

附七子而成故詩亦不出其流派朱彞尊靜志居
詩話稱其賦景有餘言情不足如觀翦綵花青紅
碧綠非不爛然卽而視之總與根株不相符可謂
定評矣

江山入集七卷

浙江汪汝璥家藏本

明江瓏撰瓏有名醫類案已著錄是集凡詩五卷
文二卷汪道昆爲作傳稱其少補諸生以病謝舉
子業專事吟咏故其詩較勝於文特少嫌薄弱別
有武夷游藁游金陵詩二集今皆未見獨此集之

未附存其原序二篇而已

尙元草八卷咏物詩二卷

浙江巡撫
採進本

明姚寬撰寬字叔信號元岳秀水人何三畏爲作
小傳稱其少以事繫獄與詩僧同羈因得其詩法
蓋其派出自山林故所作終無俗氣王穉登序稱
其詩清真古淡不事藻績猶春岫孤霞寒林片月
則稍過其實矣

少嶽集四卷

浙江巡撫
採進本

明項元淇撰元淇字子瞻秀水人以貲爲光祿寺

署丞是集乃其弟元汴所刊凡元汴與元淇唱和諸作亦附入焉近體頗妥適古體則力不逮矣

蛞蝓集八卷

兩淮鹽政
探進本

明鄭若庸撰若庸有類劄已著錄蛞蝓生其所自號因以名集凡文七卷詩一卷其詩與謝榛齊名然材力遜榛之富健文又其餘事矣

北遊漫藁二卷

兩江總督
探進本

明鄭若庸撰是集爲歙人汪良廸所輯前有王錫爵序稱山人今年已八十違趙而居清源又已數

年故今集中清源之詩不一而足乃其晚年作也
明詩綜載若庸有蛄蜺集不及此藁然所錄諸詩
具在茲集蓋蛄蜺集詩止一卷良廸併入此藁耳

越草一卷

浙江范懋柱家天一閣藏本

明沈明臣撰明臣有通州志已著錄明臣屢試不
第與山陰徐渭同入胡宗憲幕宗憲逮繫卒於獄
賓客星散獨明臣持所作諫詞遍爲訟寃其行誼
爲世所重詩則才氣全漏得之太易此集乃萬厯
己卯明臣適鹽官時所作留其藁於錢氏者鹽官

地近禦兒故越境也因以越草爲名元日以下數

首乃其家居所作以同爲是年之詩故並附錄焉

豐對樓詩選四十三卷

浙江巡撫
採進本

明沈明臣撰明臣生平所作詩凡七千篇屬其猶
子九疇選定爲四百篇今未見傳本是集爲廣陵
陳大科所校梓凡爲詩四千四百八十九首較九
疇所選增十倍白居易詩尙以所存太富有沙中
金屑之憾則不及居易者可知矣

徐文長集三十卷

兩江總督
採進本

明徐渭撰渭有筆元要旨已著錄陶望齡作渭小
傳載渭嘗自言書第一詩二文三畫四今其書畫
流傳者逸氣縱橫片楮尺縑人以爲寶其詩欲出
入李白李賀之間而才高識僻流爲魔趣選言失
雅纖佻居多譬之急管么絃淒清幽渺足以感蕩
心靈而揆以中聲終爲別調觀袁宏道之激賞知
其臭味所近矣其文則源出蘇軾頗勝其詩故唐
順之茅坤諸人皆相推挹中多代胡宗憲之作進
白鹿前後二表尤世所艷稱其代宗憲謝嚴嵩啟

云凡人有疾痛癢病必求免於天地父母然天地
能覆載之而不能起於顛擠父母欲保全之而未
必如斯委曲伏惟兼德無可並名名且不能報何
爲計云云雖身居幕府指蹤惟人然使申謝朝廷
更作何語錄之於集豈止白圭之玷乎蓋渭本俊
才又受業於季本傳姚江縱恣之派

案渭師季本
見明史文苑

傳

不幸而學問未充聲名太早一爲權貴所知遂

倏然不復檢束及平時移事易佗僚窮愁自知決
不見用於時益憤激無聊放言高論不復問古人

法度爲何物故其詩遂爲公安一派之先鞭而其
文亦爲金人瑞等濫觴之始蘇軾曰非才之難處
才之難諒矣渭所著有文長集闕篇櫻桃館集三
種鍾瑞先合刻之以成此集又有商氏所刻題曰
徐文長三集者亦卽此本前有陶望齡袁宏道所
作二傳宏道以爲一掃近代蕪穢之習其言太過
望齡以爲文長負才性惟不能謹防節目跡其初
終蓋有處士之氣其詩與文亦然雖未免瑕纇咸
成其爲文長而已是則平心之論也

徐文長逸藁二十四卷

江蘇周厚培家藏本

明徐渭撰此本爲其鄉人張汝霖王思任所同選如末卷所載優人謔吃酸梨偈放鵝圖偈對聯燈謎諸作鄙俚猥褻豈可入之集中鮑照集中戰字謎恐非當時舊本未可援以爲例况照詞猶雅不似渭所作摸著無節看著有節兩頭冰冷中間火熱之類也

朱邦憲集十五卷

江蘇巡撫採進本

明朱察卿撰察卿上海人福州知府豹之子邦憲

其字也爲太學生慷慨任俠與沈明臣王穉登友善集凡詩二百五十四首文一百五十六首卽明臣所訂定也

白陽集

無卷數 江蘇巡撫採進本

明陳淳撰淳字道復後以字行別字復甫號白陽山人長洲人以諸生援例入北監卒業歸不復就選明史文苑傳附見文徵明傳中淳少從徵明游以書畫擅名爲世寶重詩則寄意而已非其所長是集其五世從孫仁錫所編以同時贈答之篇附

之卷末與沈周集合刻之以兩人之詩皆爲畫掩也

隆池山樵集二卷

浙江孫仰曾家藏本

明彭年撰年字孔嘉長洲人隆池山樵其號也明史文苑傳附見文徵明傳中年書名亞於徵明然當時鮮有稱其詩者獨王世貞序稱徵明詩以韻勝而年詩以邊幅勝其詞亦頗有抑揚矣又據世貞序稱徵明孫子騑乃年女婿年死後其家取其詩文草藳於某甲得緡錢以資葬後有永嘉王公

者從某甲購得之然已佚其大半其存者僅十之三故此編有詩無文明史藝文志載隆池山樵集三卷與此不合疑刊本偶誤二字爲三云

止止堂集五卷

浙江孫仰曾家藏本

明戚繼光撰繼光有練兵實紀已著錄千頃堂書目載繼光止止堂集無卷數又橫槩藁三卷愚思藁一卷今此本橫槩藁亦三卷愚思藁則多一卷篇首總題止止堂集前有萬曆二年工部尚書郭朝賓序而集中有萬曆庚辰紀年在朝賓作序之

後蓋又嘗續有增益知虞稷所見愚思藁一卷乃
初刻之本非著錄之誤也繼光有平倭功當時推
爲良將詩亦伉健近燕趙之音而襍說中乃多及
陰隲果報神怪之事不免偏駁考繼光有登盤山
絕頂七律一首格律頗壯今石刻尚存而兩集中
皆不收始作於刻集後歟

句漏集四卷

浙江范懋柱家
天一閣藏本

明顧起綸撰起綸字更生號元名無錫人官鬱林
州州判是集卽在鬱林所作前二卷皆游覽詩三

四卷名感知篇乃歷叙素所相知者各賦一詩繫以小序凡四十首中間人品亦甚爲襍糅如於趙文華乃稱其雅志豪邁名冠英流序其罪廢事則曰感激罷官去而於方士陶仲文亦以風神端恪恭誠一至稱之皆不免阿私所好也

赤城集三卷

浙江范懋桂家天一閣藏本

明顧起綸撰是集乃萬曆戊寅起綸游赤城所作上卷爲詩六十一首下卷爲游記一篇而以贈答倡和之作間於上下卷之間別爲中卷似別集而

非別集似總集而非總集體例頗爲未善然中卷有附錄字知以起綸爲主矣故仍入之別集類焉

卯洞集四卷

浙江汪汝璥家藏本

明徐珊撰珊號三溪餘姚人官辰州府同知卯洞在盤順中里介於楚蜀之交嘉靖間珊以廟工採木於是積其二年中所作公牘襍文爲二卷詩歌爲二卷因以其地名集中有讀高蘇門集詩蓋宗法所在大致不失風格而深微則不及叔嗣也

傅山人集三卷

浙江范懋柱家天一閣藏本

明傅汝舟撰汝舟本名舟字虛木號丁戊山人一
曰磊老侯官人晚慕仙家服食之術舍鄉井遨遊
山水其詩刻意學鄭善夫喜爲荒怪詭譎之語王
世貞比之言法華作風語凡多聖少然奇崛處亦
頗能獨造特旁門曲徑不入正宗耳

包參軍集六卷

浙江巡撫
採進本

明包大中撰大中字庸之別號三川寧波人官建
陽縣縣丞以嘗預征倭之役故稱曰參軍是集隨
事立名曰薄游集曰武夷集曰歸來集曰台雁集

各一卷曰東征漫藁一卷然溥游集題卷之一則
當有佚卷矣

滄澠集八卷

江蘇周厚
堉家藏本

明張重華撰重華字虞侯華亭人是編前有張位
姜寶一序位序稱其有集百卷先梓八卷寶序稱
其文言言欲奇其詩首首欲出塵清新然大抵拉
襍不入格如稱九峯三泖曰九三雖絳守居園池
記亦不至於斯矣

栗齋文集十一卷

安徽巡撫
採進本

明金瑤撰瑤有六爻原意已著錄是集乃其外孫
汪從龍所梓文頗有軼宕之致其闡發經義之作
大抵空言多而實際少蓋其說易說周禮卽多以
臆斷云

槩庵集二卷

編修汪如藻家藏本

明汪禔撰禔字介夫別號槩庵祁門人江南通志
稱所著有家禮砭俗投壺儀節其學蓋深於禮故
集中與胡天叙書論王生二書與汪子立書贈葉
生新娶序胡氏初堂記新居告祖文奉主還宗子

祠文宗法議皆本禮以立言惟卷端上學使者一書猶明代學校之舊習可以不作耳其詩則全作擊壤集體不以聲律論矣

湛然堂詩藁

無卷數
巡撫採進本

江西

明陳汝瑒撰汝瑒字席珍高安人官廣昌縣知縣其自叙詩註云望五貢薦蓋由貢生起家也是集爲其子邦綸屬陳起元所選定格意頗爲平實然不足自名一家

龜川詩集四卷

江西巡撫
採進本

明董緒撰緒字禹方樂安人少從鄒守益鼂豹游
講良知之學故其詩不求工於聲律以理趣爲主
蓋濂洛風雅之流派也其子刑部尙書裕初刻於
東莞歲久板漶其裔孫又爲重刻然此本亦字多
殘缺殆難卒讀據其目錄尙有附錄誌狀之屬亦
佚之矣

田子藝集二十一卷

浙江汪汝
燠家藏本

明田藝蘅撰藝蘅有大明同文集已著錄此集文
選詩選十八卷乃其爲諸生時所刊北觀初稿二

稿三卷則歲貢入京廷試時所作藝蘅在嘉隆之間猶爲博洽而詩格頗嫌冗漫

方建元詩集十二卷續集一卷

浙江孫仰曾家藏本

明方于魯撰于魯有方氏墨譜已著錄是編前集以各體分編總名佳日樓集續集僅詩二十九首文一首題曰師心草則其子嘉樹所續刻也于魯初以製墨名後與汪道昆唱和遂招入豐干社中然世終稱其墨也

石西集八卷附崇禮堂詩一卷

編修汪如藻家藏本

明汪子祐撰子祐字受夫別號石西石門人性喜
爲詩自二十歲至七十歲皆編年爲集後其元孫
宗豫蒐輯遺藁屬汪懋麟等定爲是編凡詩六卷
賦一卷文一卷後附崇禮堂詩一卷則崇豫父伯
薦之作伯薦字士倩崇禎戊辰恩貢生

石孟集十七卷

兩江總督
孫進本

明汪坦撰坦字仲安號識環鄞縣人是集爲其子
長文所刊凡詩賦十卷禠文七卷前有屠隆序稱
其詩自三百篇騷選漢魏六朝唐宋文自左馬班

楊崔蔡韓柳蘇王諸體靡所不諳然核其所作不出七子之體

石門詩集一卷

福建巡撫
採進本

一名霞居集明高濂撰濂字宗呂號石門又號髯仙侯官人朱彝尊靜志居詩話云少谷鄭善夫居鼇峯北從之遊者九人鄉黨目爲十才子濂居首傳汝舟次之今卷首林向哲序稱其峻而不刻清而不矯亦非虛語然竟以爲與少谷相伯仲則濫美矣濂詩向未付梓流傳俱屬鈔本明詩綜載其

岳陽樓一詩有殘雨數聲衡岳曉句今檢原集數聲實作數峯較聲字爲工考徐燭晉安風雅所載亦同蓋詩綜刊本偶誤耳

東厓遺集三卷

浙江汪汝璠家藏本

明王襍撰襍字宗順自號天南逸叟泰州安豐場人是集其門人林訥所輯上卷爲像贊墓圖年譜語錄及同時贈答襍文下卷爲所作詩賦附載行狀銘誌祭文世系門人姓氏刊集始末襍少從其父王良至會稽傳王守仁之學沈桐贈之詩云念

子賢者後至理早已融譬彼三世醫拈授寧無從
蓋其父子皆刻意講學非以文章爲事者朱熹尊
靜志居詩話謂襍詩如一室風過雨三更月到窗
好雨應宜早秋花不恨遲坐雨新亭曉聞潮落月
時老攜杖履歸山谷閒看見孫種水田等句亦有
活脫之趣然終非專門也

儼齋集一卷

浙江巡撫
採進本

舊本題古杭月堂宗賢撰不著時代考之志乘亦
不載其名氏據其題名似乎衲子故所與唱和者

亦衲子爲多集中有和沈石田鵲橋仙詞知爲正
嘉間人也詩筆清曠頗近自然特邊幅少狹不免
傷於寒瘦

松菊堂集二十四卷

浙江孫仰曾家藏本

明孫鑒撰鑒字端峯餘姚人江西巡撫燧之孫工
部尙書陞之子也官上林苑丞是集凡詩二十卷
襍文四卷詩句清雋不入前後七子之派文則不
免於平衍鑒晚歸燭湖於宅東構漆園居之作漆
園供事別傳如滕六司農玉羽仙翁食苹仙子秦

大夫清修子姑射仙諸傳皆以文爲戲之筆也

鄭京兆集十二卷外集二卷

浙江巡撫
採進本

明鄭心材撰心材字敬仲號思泉海鹽人刑部尙書曉之孫光祿寺少卿履淳之子以廕生官至應天府治中是集爲其壻項臯謨所校凡詩文襍著十二卷其外集二卷則附錄墓碑行實之類也考其子端允所作行實中稱所著文集以外有昭明文選鈔唐人列傳見聞紀鈔三書今本唐人列傳乃編在第六卷其外集別題曰藝錄與目錄不相

應蓋隨意編次故無體例也心材老於場屋必欲
一第而卒不可得年五十始就銓平生精銳之氣
已消磨時文中詩古文特偶試爲之耳

冬谿集二卷

浙江巡撫
採進本

明釋方澤撰方澤字雲望號冬谿嘉善人秀水精
嚴寺僧也明詩選本載方澤詩俱作冬谿內外集
据此本實作冬谿外內集上卷爲外集下卷爲內
集以詩爲外以文爲內蓋詩多涉文字而文皆關
禪義故其下卷之詩亦不謂之詩而謂之偈則其

外內之義卽程氏之外學內學作內外者誤也集
中文筆牘率不出方丈語錄之格詩稍近雅而亦
不工

徐花潭集二卷

浙江巡撫
採進本

明嘉靖中朝鮮生員徐敬德撰敬德貧居講學年
五十六其國提學金安國以遺逸薦授奉參力辭
不就居於花潭因以爲號是集禰文禰詩其二卷
其文中原理氣一篇末有附記稱曰先生鬼神生
死論一篇末亦有附記稱以上四篇皆先生病亟

時作詩中次申企齋韻一首附錄原作稱企齋附
先生詩蓋其門人所編也敬德之學一以宋儒爲
宗而尤究心於周子太極圖說邵子皇極經世集
中稌著皆發揮二書之旨其送沈教授序全然邵
子之學也其論喪制疏答朴枝華書亦頗究心禮
制蓋東土之務正學者詩則強爲擊壤集派又多
禱其國方音如所謂窮秋盛節換木落天地瘦體
近郊島者不多見也他如無弦琴銘不用其弦用
其弦弦律外宮商吾得其天非樂之以音樂其音

音非聽之以耳聽之以心彼哉子期盍耳吾琴稍
得蘇黃意者亦偶一遇之然朝鮮文士大抵以吟
詠聞於上國其卓然傳濂洛關閩之說以教其鄉
者自敬德始亦可謂豪傑之士矣故詩文雖不入
格特存其目以表其人焉

欽定四庫全書總目卷一百七十九

集部三十二

別集類存目六

滄海披沙集十三卷

江蘇巡撫
採進本

明泌水王朱珪堦撰珪堦號玉源藩簡王模之七

世孫昭定王恪衍子隆慶元年襲封萬曆二十九

年卒謚康僖見明史諸王世表所著有衡漳初稿

栖雲洞集雲竇寤言葵園紀言公族論等書嘗刻

於遜學書院繼合爲一編於吳中重刻之總名曰

滄海披沙集穆文熙詩話謂王詩丰神俊逸思致
雅澹格調在大厯以前今觀集中若夏日東園詩
月落棋聲久涼生酒興多潛龍寺訪孟誠菴詩借
宿閒多咏求名靜覺非春初過涵春閣詩酒嫌蘆
笋少春恨李花多等句其格調頗近四靈殊未足
追踪大厯至於文體贅牙更不出王李流派矣

芝堂遺草七卷

福建巡撫
採進本

明葉朝榮撰朝榮有詩經存固已著錄是集爲其
子大學士向高所刊凡詩一卷雜文六卷其名芝

堂者朝榮判江州時有靈芝產於所作仕學軒前
改軒曰瑞芝堂自爲之記因以名集朝榮詩格文
格並明白坦易大抵偶然涉筆非刻意欲成一家
者也

四遊稿六卷

浙江巡撫
採進本

明趙志皐撰志皐有內閣奏疏稿已著錄是集前
二卷爲初入翰林時作第三卷爲官南京時作第
四卷爲使楚時作第五卷爲客粵時作題曰四遊
蓋取於此第六卷乃還山以後之作亦併附焉

朱秉器集八卷

浙江汪汝
栗家藏本

明朱孟震撰孟震有河上楮談已著錄此集文四
卷詩四卷爲張九一所選錄文不出當時習尙詩
則音節諧暢而意境不深

穀城山館文集四十二卷

山東巡撫
採進本

明子慎行撰慎行有讀史漫錄已著錄此集乃所
作雜文也明中葉以後文格日卑學淺者蹈故守
常才高者破律壞度慎行之文雖不涉弔詭之習
至於精心結構灝氣流行終未能與唐順之王慎

中歸有光等並據塏帖故錄其詩集而文集則附存目焉

龐眉生集十六卷

山東巡撫採進本

明于慎思撰慎思字無妄號航隱東阿人于慎行之弟也是集詩七卷雜文八卷樂府一卷皆有縱橫排奐之氣而頗涉粗豪

程幼博集六卷

浙江孫仰曾家藏本

明程大約撰大約字幼博休寧人是集爲于慎行所選凡雜文二卷詩四卷多暢所欲言不拘格律

如泛駕之馬不可以羈勒範之前有焦竑序引孔
子辭達之說謂巷伯之譏刺巧言之怨怩何人斯
之迫切自後世論之豈不傷溫柔敦厚之體而聖
人乃錄之於經以爲與辭達之旨有合又稱其骯
髒之姿不爲世格所約結持論侃侃脂韋突梯之
人多所不悅而亦爲慷慨好義者之所深與則大
約固賦性剛毅直情而徑行者宜發於文章亦肖
其爲人也

雲東拾草十四卷附錄二卷

浙江孫仰
曾家藏本

明韓世能撰世能字存錄長洲人隆慶戊辰進士官至南京禮部侍郎召入兼翰林學士事迹附見明史黃鳳翔傳世能以鑒藏書畫名一時張丑所爲輯南陽書畫表也史稱其教習庶吉士館閣文字是科爲盛考董其昌洛神賦十三行跋稱館師韓宗伯則當爲萬厯己丑科據明史文苑傳所載焦竑黃輝諸人固較他科爲稍勝然世能詩文則不出王李門徑是集爲所自編歿後二十年其子逢祐乃刊行附以誥勅諭祭葬文及碑銘傳狀

玉恩堂集九卷附錄一卷

浙江孫仰會家藏本

明林景暘撰景暘字紹熙華亭人隆慶戊辰進士官至南京太僕寺卿是集爲其子有麟所編凡奏議二卷叅詞二卷詩二卷文三卷附錄碑誌行狀一卷王錫爵張以誠二序及張孟男所撰碑申時行所撰墓誌皆不稱其文章惟杜士全序及王圻所作行狀稍稱之云

醒後集五卷續集一卷附京省次五卷

福建巡撫採進本

明盧維禎撰維禎字瑞峰號水竹居士漳浦人隆

慶戊辰進士官至戶部侍郎是集爲維禎致仕以後所自刊題曰醒後言如夢之醒也其集以奏疏公移評駁與詩文雜著共爲一編蓋維禎留心吏事故案牘亦一一錄存未附京省次一冊中分地望次府州縣次財賦次會狀次甲科卿輔次蓋亦手錄成編以備紀事但刊入文集則濫矣

朱文懿文集十二卷

浙江巡撫
採進本

明朱賡撰賡字少欽浙江山陰人隆慶戊辰進士官至文華殿大學士事迹具明史本傳萬曆二十

九年大學士趙志臯罷神宗慮朝臣植黨乃起賡
入閣後沈一貫沈鯉並罷賡遂獨相七年史稱其
醇謹無過然無所建白惟是時東林聲氣傾動一
時賡獨借漢唐宋朋黨之害以立論謂漢之黨皆
君子而懼小人之害其勢在小人故使卓操之徒
得以假手而國移於強臣唐之黨君子小人互相
攻擊其勢兩盛而卒兩敗故使朱全忠得以竊入
而國移於盜賊宋之黨皆以德行文章標表一時
其勢在君子而芟除太過不能使其身安於朝廷

之上故使呂蔡諸人得以藉口而國移於隣敵黨
愈衆則害愈深變愈大其言切中時病厥後明社
旣屋乃信賡言其深識早見有非顧葉諸人所及
者其文則未能自成一家蓋本不以詞章名也

王文端集十四卷

山西巡撫
採進本

明王家屏撰家屏有王文端奏疏已著錄據明史
藝文志其集凡二十卷千頃堂書目作復宿山房
集凡四十卷今未見傳本是集奏疏四卷詩二卷
尺牘八卷凡三種据尺牘卷首韓爌序稱家屏之

子已哀彙全帙次第授梓則此其不完之本也朱
彝尊明詩綜載其題長陵四駿圖古體詩四首茲
集亦未載入知其散佚者多矣

溪山堂草四卷

浙江汪汝
璩家藏本

明沈思孝撰思孝有秦錄已著錄是編乃其晚年
之作思孝名入瑯琊四十子之列論者謂其晚交
姚士粦故間作贅牙之語然其有韻之文亦復流
麗特雜著喜爲澁體耳

天遠樓集二十七卷

浙江孫仰
曾家藏本

明徐顯卿撰顯卿字高望號檢菴長洲人隆慶戊辰進士官至吏部侍郎是集爲其嗣子元滂所編前有王穉登序曰先生卜居陽羨士大夫莫名先生文先生亦不自名文也余與先生雖同枌櫚迹若風馬牛然第聞人言先生長者遂亦長者先生未幾先生來過余每談立言之業不東向讓三卽南向讓再余竟莫名先生而僅識先生長者云云是殆有微詞矣

華禮部集八卷

浙江巡撫
採進本

明華叔陽撰叔陽字起龍無錫人隆慶戊辰進士官禮部主事年二十九卒叔陽爲華察之子王世貞之婿故所作五言頗有父風七言則詞調朗暢兼涉太倉流派其以詩部文部分卷亦仿世貞四部稿式也

閒雲館集鈔六卷

兩江總督
採進本

明張位撰位有問奇集已著錄是集據于慎行原序有內外二編今本乃其從子希載所選錄故名集鈔每篇具綴評語皆希載所爲明史稱位當神

宗並封三王遽請篤修交泰早兆高禩及疏薦楊
鎬依違礦稅諸事其疏稿是集皆不載蓋希載諱
而刪之也又史稱位謚文莊而此集皆稱文端則
未喻其故矣集刻於康熙九年而首有黎元寬序
蓋明末編訂之時元寬尙在云

江岷嶽文集四卷

浙江巡撫
採進本

明江以東撰以東字貞伯全椒人隆慶戊辰進士
官至江西提學副使是集爲其門人謝廷諒謝廷
讚舒曰敬旻文輝同編凡詩一卷文三卷皆不出

當時風氣其第一卷目錄惟載奏疏二篇而集中併載諸記又割二卷中序數篇附之亦編校之疎也

鍾臺集十二卷

福建巡撫
採進本

明田一儁撰一儁字德萬大田人隆慶戊辰進士官至禮部侍郎事迹具明史本傳一儁視身嚴苦家無餘貲爲侍講時以劾張居正救吳中行有直聲其人自正其文則未能逮古

大泌山房集一百三十四卷

安徽巡撫
採進本

明李維禎撰維禎有史通評釋已著錄是集詩六
卷雜文一百二十八卷而一百二十八卷之中世
家傳誌碑表行狀金石之文獨居六十卷記載之
富無逾於是然牽率之作過多不特文格卑冗並
事實亦未可徵信明史文苑傳稱維禎爲人樂易
濶達賓客雜進其文章宏肆有才氣海內請求者
無虛日能屈曲以副所望碑版之文照耀四裔門
下士招富人大賈受取金錢代爲請乞亦應之無
倦然文多率意應酬品格不能高也朱彛尊明詩

綜亦謂本寧著作如官厨宿饌粗鹿肥麋雖腍
具陳鼃薺襍進無當於味今核是集知非故爲詆
毀矣

劉聘君全集十二卷

江西巡撫
採進本

明劉元卿撰元卿有大象觀已著錄元卿師事耿
定向及同邑劉陽講求心學而其詩文乃多慶弔
之篇罕見闡發理道類閭中所刊林網山集考江
西通志元卿所著本有山居草還山續草諸編此
本爲其門人洪雲蒸等所輯觀其體例舛襍知其

去取之失當蓋已非元卿之舊本矣

不二齋文選七卷

浙江巡撫
採進本

明張元忬撰元忬有紹興府志已著錄明史儒林
傳稱元忬少負氣節年十九聞楊繼盛死爲文遙
祭之又稱其自未第時卽與鄧以讚從王畿游傳
良知之學然皆勵志潛修躬行實踐以讚品端志
潔元忬亦矩矱儼然無蹈入禪寂之病與畿之恣
肆迥殊是集凡文六卷詩一卷亦無語錄粗鄙之
習但於是事非當行耳

粵草十卷蜀草七卷

江西巡撫
採進本

明郭子章撰子章有蟪衣生易解已著錄其平生所作之文皆每官一地卽爲一集此粵草其官廣東潮州知府時作蜀草其官四川提學僉事時作也前有萬厯庚寅周應鰲序稱子章沒於廬山粵草先出越若干年蜀草乃出蓋作於諸草之前而刻則在子章身後其標題皆曰自學編則子章諸草之總名云

晉草九卷楚草十二卷家草七卷

江西巡撫
採進本

明郭子章撰晉草乃其由浙江參政遷山西按察使時所作在萬厯二十一年楚草乃其由山西遷湖廣布政使時所作在二十二年家草則由福建布政使入覲歸而乞休時作在二十六年也此後卽接黔草矣是集鈔本訛脫甚多併佚其家草之第六卷考其總目所缺凡尺牘十八首故原目八卷今以七卷著錄焉

黔草二十一卷

浙江汪汝璠家藏本

明郭子章撰是集自爲一編乃其巡撫貴州時作

總目雖題二十一卷而第八卷分九子卷第九第十第十一第十二第十七卷皆分二子卷卷十四分三子卷實三十四卷不明其例至卷十四後既曰卷又十四又曰卷又又十四尤覓見也案千頃堂書目子章所著尙有閩草十六卷留草十卷浙草十六卷閩藩草九卷養草一卷苦草六卷傳草二十四卷今皆未見而粵草十卷黃虞稷乃不著錄蓋當時隨作隨刻又隨意以數種爲一帙多寡分合初無一定故所見參差不一耳

李中丞文集二卷

江西巡撫
採進本

明李涑撰涑字源甫號養愚雋都人隆慶辛未進士官至右僉都御史巡撫應天是集爲

國朝康熙十年其里人易學實所刻大抵皆應俗之作蓋涑本以清介著學實之刻其遺文特重其爲人耳

文潔集四卷

江西巡撫
採進本

明鄧以讚撰以讚字定字新建人隆慶辛未進士官至吏部侍郎謚文潔事跡具明史儒林傳以讚

早以孝行聞晚退居西山三十年以清介爲世所重而無所著述此本乃吉水鄒元標蒐輯於斷簡散帙之中宜與吳達可爲之付梓其講學語僅存數則餘不過奏疏三首與書序記傳諸應酬之文耳中附詩數十首尤非所長也

方初菴集十六卷

浙江孫仰曾家藏本

明方揚撰揚字思善號初菴歙縣人隆慶辛未進士官至杭州府知府是集第一卷爲語錄二卷爲箴論三四卷爲詩五卷至十六卷爲雜文其語錄

箴論尙皆切實惟詩文多酬應之作未附蒞官時
諸告條尤爲冗襍揚本有山中燕中中州南署等
稿此集乃其門人賀燦然所合編也

陳如岡文集二卷

兩江總督
採進本

明陳大科撰大科字思進號如岡南通州人隆慶
辛未進士官至右都御史兼兵部侍郎總督兩廣
大科官給事中時因歲旱上弭災六事遷太常卿
時又疏救李獻可等又劾太監馮保有直聲及總
督兩廣有定安南功是集上一卷具錄當時奏疏

下一卷則雜文數篇而已

賜餘堂集十四卷

內府藏本

明吳中行撰中行字子道號復菴武進人隆慶辛未進士官編修時與趙用賢等論張居正廷杖削籍後屢起屢廢卒不大顯終於侍講學士掌南京翰林院事事迹具明史本傳是集爲其子大理寺少卿亮所編中行以鯁直稱詞章不甚著於世集中植綱常正朝廷二疏氣節凜然又不以詞章論矣

鄒聚所文集六卷外集一卷

浙江巡撫
採進本

明鄒德涵撰德涵字汝海安福人隆慶辛未進士
官至河南按察司僉事明史儒林傳附見其祖守
益傳末是集凡詩一卷文五卷其外集一卷則皆
厯官誥勅及往來書牘也詩文多涉禪機持論亦
往往偏駁史稱守益子善服習父訓踐履無怠稱
其家學而德涵從耿定理游定理不答發憤湛思
自覺有得於是專以悟爲宗於祖父所傳始一變

云

研山山人漫集一卷

浙江孫仰曾家藏本

明方盱撰盱字文明後棄舉子業將遊五岳取莊子逍遙遊語改名大年蘇州人居洞庭東山是集爲湖州沈庭詔所編前有隆慶二年姜元序茅翁積方山人傳又列翁積詩評數條逐體分論多大言無實至詆束皙補亡穢不可讀其分五言律五言排律爲二格而云排律本賦體又謂絕句裁自近體皆漫無依據其推重盱詩以四言六言比嵇康五言比陶潛五言律比張九齡五言絕句比王

維然皆所謂形骸之外去之愈遠七言古詩尤爲
淺薄翁積總評謂侈萬言於毫末恣百態於細縹
雖有歉於豪士實無損於專門則亦知其才地之
弱矣

蒼耳齋詩集十七卷

浙江孫仰曾家藏本

明方問孝撰問孝字胥成歙縣人仕履未詳歙縣
志亦無其名姓集中有與汪道昆詩當是隆萬間
人其詩風華有餘深厚不足蓋亦沿七子之派多
浮聲而少切響也

交泰館集十卷

江西巡撫採進本

明萬道光撰道光字日章臨川人是集詩文皆未入格其學以金谿爲宗說經諸篇皆疎於考證如或謂綱目不出朱子手道光以爲無的考是不知有趙師淵也伊尹放之于桐放字爲教字之誤乃沈括夢溪筆談之說道光亦未能引據

汪禹父詩集八卷

浙江孫仰曾家藏本

明汪淮撰淮字禹父休寧人隆慶間山人也是集皆古今體詩前有陳履王世貞劉鳳汪道昆吳子

玉諸人序子玉序稱令其伯子懋孝手錄成卷論
於余盡准所自編其詩皆依託七子之門戶故世
貞等頗獎借焉

巢雲軒詩集六卷續集五卷詩餘一卷

安徽巡撫
採進本

明吳宗儒撰宗儒字次魯號黃麓晚號止耕休寧
人其詩工於聲律然運意不深風骨亦未成就

卓光祿集三卷

浙江汪汝
璠家藏本

明卓明卿撰明卿有卓氏藻林已著錄所著有卓
激甫詩集續集北游稿文集三山游稿諸編其子

爾康請曹子念哀合刪定編爲此集其詩頗囿於風氣未能自出新裁

卓漱甫詩續集三卷

江蘇巡撫探進本

明卓明卿撰是集爲明卿所自編刻於萬厯甲申李維禎序稱元美兄弟左提右挈足使漱甫不朽深有不滿之詞焉

廣讌堂集二十四卷

兩淮鹽政探進本

明樊山王朱翊鉉撰翊鉉字匡鼎自號隱真子荆王瞻罔六世孫萬厯庚子襲封其父載岑以文衍

稱翊鈺世其家學與弟翊鏐翊鏞皆好爲詩兄弟
嘗共處一樓號花萼社楚藩多強橫樊山一派其
最文雅者也是集賦及三言四言詩共一卷五七
言古今體詩共二十二卷長短句一卷大抵多近
香山之派末有道德經說奧二卷題曰朱孟嘗撰
蓋亦楚宗是以附錄與詩集爲不倫今別入子部
道家類焉

梅雪軒詩稿四卷

兩淮鹽政
探進本

明朱敬鑑撰敬鑑字進父秦愍王懷八世孫萬厯

中爲奉國中尉詩格淺弱敷衍成篇而已

樂陶吟草三卷

浙江巡撫
採進本

明姚舜牧撰舜牧有易經疑問已著錄是集乃康熙癸丑其曾孫淳顯所刊朱熹尊靜志居詩話謂舜牧以厚德聞鄉里事難悉書詩不專工然頗自喜今觀是編皆沿白沙定山之派首載論詩一首有云試讀二百篇寫意不求工但能矢口發含蓄自無窮其宗旨可見矣據淳顯後序所刊乃詩文全集此本有詩而無文豈佚其半耶

林初文詩選一卷

兩江總督
採進本

明林章撰章本名春元字初文福清人萬厯癸酉
舉人坐事除名後上書言兵事庾死於獄是集前
有曹學佺序曰初文才士爲嫉者所中所作多散
佚其子裒輯爲一帙梁溪尤時純付梓則是集本
有刊板而此乃寫本蓋傳錄於板佚之後也凡賦
二首詩八十二首學佺序稱其海月賦而此本無
之蓋鈔胥又有所漏矣

鬱儀樓集五十四卷

江蘇巡撫
採進本

明鄒廸光撰廸光字彥吉無錫人萬厯甲戌進士官至湖廣提學副使年四十卽罷歸築室惠山多與文士觴詠優游林下者幾三十年時王世貞已歿廸光欲代領其壇坫然竟不能也是集凡賦一卷詩二十九卷雜文二十四卷其詩文皆欲矯雕鏤翻成淺易故朱葵尊靜志居詩話深不滿焉特畧取其絕句而已

石語齋集二十六卷

兩江總督
採進本

明鄒廸光撰其以石語名齋蓋用庾信讀溫子昇

韓陵山寺碑事亦高自位置矣案江南通志文苑
傳載廸光集凡三百餘卷而不詳其名明詩綜載
廸光所著有鬱儀樓集調象菴稿始青閣集不載
此集明人集刻本叢禪著錄互異此亦其一也

調象菴稿四十卷

兩江總督
採進本

明鄒廸光撰案涅槃經曰譬如醉象狂騃暴惡多
欲殺害有調象師以大鐵鈎鈎斲其項卽時調順
惡心都盡一切衆生亦復如是貪慾瞋恚愚癡醉
故欲多造惡業諸菩薩等以聞法鈎斲之令住更

不得起造惡諸心云云此編乃迪光之續集蓋晚
歲所作時方歸心釋氏故以調象名菴因以名集
云

快獨集十八卷

山東巡撫
採進本

明李堯民撰堯民字耕堯濟寧人萬厯甲戌進士
官至工部右侍郎是集凡詩六卷文十二卷快獨
者所居樓名也雜文中奏疏一類敷陳頗爲剴切
詩則秀潤有餘而興象不足純爲七子之派故序
之者爲李維禎焉

征南草一卷

陝西巡撫
探進本

明王邦俊撰邦俊字虞卿鄜州人萬曆甲戌進士
官至貴州兵備參政是編卽貴州所作時苗民不
靖起邦俊理兵事故以征南爲名凡詩三十餘首
賦一首又母老乞致仕上兩院呈詞一首亦併附
焉

林伯子詩草一卷

福建巡撫
探進本

明林兆珂撰兆珂有詩經多識編已著錄此集本
名挈朋草其題曰林伯子者蓋其序爲柯壽愷所

作乃當日同社之辭也凡詩二百三十餘首其中
七言律詩頗得錢劉風調集中亦惟此體最多古
詩則不能入格蓋晉安一派皆從七言律詩入也

隅園集十八卷 蘄川集八卷

浙江巡撫
採進本

明陳與郊撰與郊有檀弓集註已著錄隅園集皆
所作雜文及詞曲其文摹仿漢魏似古色斑駁而
不出弇州四部之門徑又以其子臯坐鹽徒事陷
冤獄上書武安王及縣城隍神亦載集中雖秦詛
楚文古有其事編入文集頗覺不倫蘄川集皆其

里居之時與人尺牘益爲小品矣與郊集總名奉
常佚稿凡分四種首爲隅園集次爲黃門集次爲
贛川集次爲聆癡符聆癡符者語出顏氏家訓謂
可笑之詩賦也今黃門集別入奏議聆癡符又有
錄無書故惟以此二編著錄集部焉

去偽齋文集十卷

江蘇巡撫
採進本

明呂坤撰坤有四禮疑已著錄是集爲其孫慎多
等所刊坤於明季講學諸儒中最爲篤實是集亦
多有裨世道之文而出於後人之編錄一切俳諧

筆墨無不具載夫韓愈雜說僅數條耳其他寓言
惟毛穎傳石鼎聯句編入集中草華傳嘲黶睡諸
篇卽不編入李漢所以爲有識惜編是集者昧此
也至於應俗之文連牘不已益爲眼中金屑矣

來禽館集二十九卷

浙江汪汝
璠家藏本

明邢侗撰侗字子愿臨邑人萬厯甲戌進士官至
陝西行太僕卿明史文苑傳附載董其昌傳中是
集凡文二十四卷詩僅五卷侗以善書得名當時
有北邢南董之目其序十慎行詩集謂李何學唐

爲化鳩之眼而於太倉厯下並有微詞蓋能不依
七子門戶者故所作大抵和平雅秀王士禎論詩
絕句亦有來禽夫子本神清之語特骨幹未堅不
能自成一隊文體則更近於澁矣

支子餘集五十二卷

浙江汪汝璫家藏本

明支大綸撰大綸有世穆兩朝編年史已著錄是
編乃大綸自萬厯丙子至壬寅所撰詩賦雜文凡
藝餘十四卷政餘八卷屯餘八卷耕餘八卷敦餘
二卷述餘六卷又永陵編年史四卷明陵編年史

二卷卽所謂世穆兩朝編年史也集內酬應之作居多語亦間涉荒誕觀其自題像贊及題觀音像贊竟以孔子自居是何言歟

御龍子集七十七卷

兩江總督
探進本

明范守己撰守己有曲洧新聞已著錄是編以集爲名實則兼收其說部故目錄每卷惟署曰御龍子第幾首爲膚語四卷次天官舉正六卷次參兩通極六卷次卽曲洧新聞四卷次乃爲吹劒草五十三卷膚語皆襲宋人緒論無所發明天官舉正

則抄撮各史天文志亦無所考正參兩通極摹倣
太元潛虛皇極經世諸書於八卦之外別爲元息
進隆中殺消沮八卦名因而乘之爲九八七十二
卦以當七十二候變象曰繹變象辭曰專變爻象
曰繇末爲索辭八篇以擬繫辭又出諸家僭經之
下曲洧新聞雜記時事蓋倣朱弁曲洧舊聞而於
張居正屢以謀篡書之未免恩怨之詞不足徵信
吹劍草爲所作詩文自稱不作唐以後語然刻意
摹擬斧鑿之痕不化

鄧聖集十二卷

浙江孫仰曾家藏本

明范守己撰是編於宦遊所至各爲一集曰西餉稿曰雲間稿曰北行稿曰吳中稿詩文詞賦雜編不分體裁王世貞爲之序語亦在抑揚之間

楊居集二卷田居稿一卷河上稿一卷

直隸總督採進本

明李化龍撰化龍有平播全書已著錄其平生以經濟著平播治河諸疏表表當代原不必以詩見乃必欲以功業兼文章其畫蛇之足乎

少室山房續藁十五卷

浙江汪汝霖家藏本

明胡應麟撰應麟有筆叢已著錄是編凡兩都集一卷蘭陰集一卷華陽集十卷養疴集二卷青霞藁一卷僅止五種蓋類藁未出以前隨作隨刊之本也

郊居遺稿十卷

安徽巡撫採進本

明沈懋學撰懋學字君典宣城人萬曆丁丑進士第一授翰林院修撰追謚文節事迹附見明史田一傳傳是編詩三卷雜文七卷萬曆乙巳其兄子有容刊於福建懋學官翰林時值張居正奪情與

吳中行趙用賢謀各上疏吳趙皆受杖去國而懋
學疏章爲人所持不果進乃貽居正子嗣修書又
與工部尙書李幼滋書以爭之今集中有擬救建
言諸臣令大學士張居正奔喪疏一篇蓋卽其時
未上之稿然非擬疏之難上疏之難也旣未上矣
存之何爲乎

快雪堂集六十四卷

浙江朱彝尊家
曝書亭藏本

明馮夢禎撰夢禎有歷代貢舉志已著錄夢禎舊
藏王羲之快雪時晴帖故以名堂後帖歸馮銓堂

名亦隨之而移實則始自夢禎也是編文六十二卷詩止二卷所作皆喜於疏快不以鏤刻爲工而隨意所如無復古人矩矱矣

海門先生集十二卷

浙江朱彝尊家
曝書亭藏本

明周汝登撰汝登有聖學宗傳已著錄是集凡文十卷詩二卷集中如九解九篇越中南都剡中東粵新安會語五篇皆聚徒講學之語其釋良知二字謂良訓甚也當如至善至德至禮至樂太極太初等至字太字皆甚字之義有不可擬議不可名

言之妙其立義新奇非惟孟子無此說卽王守仁亦無此說斯真龍溪末派惟所欲言者矣詩亦作白沙定山之體其正唐詩一十五首尤不可解如取李白問余何事棲碧山一首翻其意而竄改之曰桃花流水依然在別有天地只人間是不幾王安石之一鳥不鳴山更幽乎

東越證學錄十六卷

安徽巡撫
採進本

明周汝登撰汝登傳王畿之說故是錄以證學爲名而會語亦與詩文並列

可菴書牘十卷

兩江總督
採進本

明張棟撰棟字可菴崑山人萬厯丁丑進士官至
兵科都給事中是編爲其邑人王煥所編以其厯
任書牘分卷排纂亦王儉一官一集之例也

詹養貞集三卷

江西巡撫
採進本

明詹事講撰事講字明甫別號養貞江西樂安人
萬厯丁丑進士官至北直隸提學御史其集初刻
於萬厯戊戌凡文三卷詩四卷後詩集散佚僅存
文集

國朝乾隆庚申其元孫道行重刊之卽此本也事講
從羅念先遊傳姚江良知之學陳獻章王守仁之
從祀實允事講之請集中以此疏爲冠蓋其生平
宗旨所在也

片玉集四卷

江西巡撫
採進本

明陳邦科撰邦科字俊卿號警亭高安人萬厯丁
丑進士官至河間府知府是集凡閨瀛漫語一卷
言書要覽一卷留臺疏稿一卷聽花軒摘稿一卷
其閨瀛漫語皆設爲問答以辨析物理力闡星命

輪迴之說持論甚正其謂欲端善敗之原者謹諸
德握治亂之機者慎諸人尤爲切實至謂理之變
者爲怪氣之變者非怪國家之盛衰本於乖和不
闢祥異則主持太過欲破讖緯之妄轉岐天人而
二之不幾於天變不足畏乎言責要覽及留臺疏
稿皆其官南京御史時所作明至萬厯以後居言
路者大率矯激攻訐以致國是紛拏迄於亂亡而
未已邦科所列十一條分目爲四十三中有當緩
言者三婉言者二勿輕言者七勿爲人言者五可

謂曲中明季諸臣之習其疏稿如論罪謫言官救
李材論西夏撫賊失策諸篇亦頗剴切惟詩筆粗
厲全不入格耳教文禎作邦科墓誌云所著尙有
循良模範辨問錄二書今集中未見或選刻時所
佚歟

梅谷集十八卷

浙江巡撫
採進本

明莊履豐撰履豐字中熙晉江人萬厯丁丑進士
改庶吉士其集前十四卷皆雜文後四卷爲詩其
門人黃汝良何喬遠等所編履豐以奉兄喪歸里

邁疾早卒未掌制誥而集中有冊文奏書等篇殆
皆其館課之擬作耶

寶庵集八卷

江蘇周厚
堉家藏本

明顧紹芳撰紹芳字實甫太倉人萬厯丁丑進士
官至左春坊左贊善是編前有馮琦三太史集序
一篇稱紹芳及王敬卿葛仲明之詩皆所手定則
此集爲三家之一種也朱彝尊靜志居詩話云實
甫詩工於五律不露新穎矜鍊以出之頗有近於
孟襄陽高蘇門者今觀其集終覺意境未深也

瑞陽阿集十卷

兩江總督
探進本

明江東之撰東之字長信歙縣人萬厯丁丑進士官至右僉都御史巡撫貴州事迹具明史本傳明別有洗馬江朝宗字曰東之或混爲一人非也東之嘗築室瑞金山中故以瑞陽阿名集其立朝頗著風節初劾馮保徐爵又劾王宗載于應昌及駙馬都尉侯拱宸繼以爭壽宮事與李植楊可立均坐貶其詳見魏禧所爲傳中故集中奏議居半云

楊文懿集十二卷

浙江巡撫
探進本

明楊起元撰起元有識仁編已著錄是集爲其孫
廷春所刊据目錄作二十卷而自十一卷至十八
卷皆註云嗣刻其有錄有書者僅十二卷蓋哀輯
未竟之本也

松門稿八卷

浙江巡撫
採進本

明王庭譔撰庭譔字敬卿華州人萬曆庚辰進士
官至翰林院修撰年未四十而歿故詩文皆未成
就馮琦序其詩稱其有沉鬱邁往之氣而文以質
掩蓋道其實云

孟雲浦集八卷年譜一卷附錄一卷

河南巡撫
採進本

明孟化鯉撰化鯉字叔龍號雲浦新安人萬厯庚辰進士官至吏部文選司郎中持正不阿後以奏起給事中張棟先事削籍歸事迹具明史儒林傳化鯉少從尤時熙遊講良知之學以無欲爲宗以慎獨爲本其集初刻於萬厯間此本則康熙癸卯其後人所重刊也據其原目卷一爲尊聞錄皆所聞於時熙之語卷二至卷五爲文卷六卷七爲雜著卷八爲詩首冠以年譜其門人王以悟所編附

刻謚議像贊諸作則其後人所續輯

梅園集二十卷

浙江汪汝璩家藏本

明沈一中撰一中字長孺鄞縣人萬厯庚辰進士官至布政使是集詩賦八卷雜文十二卷大抵欲以才藻見長而短於翦裁澄汰

九芝集選十二卷

內府藏本

明龍膺撰膺字君御武陵人萬厯庚辰進士官至南京太常寺卿是集皆所作詩賦乃其兄襄所選定以卷首冠以九芝賦遂以名之

姑孰集二卷

浙江巡撫
採進本

明章嘉禎撰嘉禎字元禮德清人萬厯庚辰進士
官至大理寺寺丞是集詩文雜編殊無體例蓋未
定之稿詩筆亦清雋而多近率易其名曰姑孰以
嘉禎嘗爲當塗知縣故也

崇雅堂集十五卷

山東巡撫
採進本

明鍾羽正撰羽正字叔濂益都人萬厯庚辰進士
官至工部尙書事蹟具明史本傳是集賦詩六卷
文九卷爲其門人高有聞元野鶴所編羽正清介

耿直爲時所重故集中奏疏多切中時弊其他雜文則率爾操觚者居多詩多感激時事之作氣體尙遒然未免沿七子之末派

負苞堂稿九卷

浙江汪汝璠家藏本

明臧懋循撰懋循字晉叔長興人萬厯庚辰進士官國子監博士詩多綺羅脂粉語未免近靡靡之響懋循善顧曲元明雜劇皆所梓行故詞曲序引屢見集中亦其結習之所在也

農丈人文集二十卷詩集八卷

浙江巡撫探進本

明余寅撰寅有乙未私志已著錄朱彝尊靜志居詩話謂其自負古文然於作者尙遠其於詩自謂涉其藩未窺其奧亦自知之矣是集乃其歸田以後所輯考農丈人星見天官書又雲仙雜記載陶潛聽水稱吾師農丈人事寅之命名似取陶語也

楊道行集十七卷

浙江巡撫探進本

明楊子庭撰于庭有春秋質疑已著錄是集于庭所自編其詩沿何李之派故擬騷擬樂府古詩不能變化蹊徑唯五言古詩時露清挺本色尙存其

官職方時值寧夏及倭寇之亂於本兵多所贊畫
及事平而竟中察典與虞淳熙同罷歸是爲萬厯
中門戶交爭之始故憤鬱不平屢形篇詠然事殊
屈子而怨甚行吟未免失之過激與風人溫厚之
旨爲有間矣

青棠詩集八卷

浙江孫仰曾家藏本

明董嗣成撰嗣成字伯念烏程人萬厯庚辰進士
官至禮部郎中是編乃嗣成歿後其友茅維所編
前有謝肇淛序稱嗣成古選憲章陶謝近體沐浴

岑王如姑射仙人飡風飲瀝蓋畧舉其近似至云
使天假以年駸駸乎將立壇坫與海內爭雄則已
顯言其學力尙淺矣

鄒孚如集

無卷數 浙江
巡撫採進本

明鄒觀光撰觀光字孚如雲夢人萬厯庚辰進士
官至南京兵部郎中擢太僕寺少卿未上而卒是
集皆雜文無詩前無序目板心亦不刊卷次蓋未
定之本其文往往體近制藝蓋揣摩科舉先入者
深觀其雲夢儒學藏書記極論明人不務博學非

久歷名場不能言之如是切中也三楚文獻錄稱
觀光與魏允中顧憲成以文學經濟相砥礪在吏
部發諸吏增減文書拜官事抵罪者數百人一洗
部弊因陳論不合乞歸養事親十餘年始補南職
方郎是其生平建監固不以詞章見長矣

來復堂集二十五卷

江西巡撫
採進本

明曾維倫撰維倫字惇吾江西樂安人萬歷庚辰
進士官至嘉興府同知是集前有萬歷丁亥黃洪
憲序稱維倫出詩古文一編則是集原本爲所自

定然未及校梓歲久漸佚乾隆壬戌其六世孫廷
試乃裒輯佚稿刊板卽此本也維倫學出姚江與
焦竑李材羅汝芳等共闡良知之旨故文集十九
卷以理學見解三卷爲冠詩集六卷以理學詩六
十一首爲冠云

玉堂遺稿

無卷數 湖北
巡撫採進本

明蕭良有撰良有字以占號漢冲漢陽人萬厯庚
辰進士官至國子監祭酒良有在史局十五年長
於當時制誥之文規模宏敞有承平臺閣之體是

集爲其曾孫延昭等所編分類排比不分卷數未
有補遺及葉向高所撰墓誌一篇

不爲堂集四卷

江蘇巡撫
採進本

明史孟麟撰孟麟字際明號玉池宜興人萬厯癸
未進士官至太僕寺卿崇禎初追贈禮部右侍郎
事迹具明史本傳孟麟持正不阿屢忤權倖氣節
動天下其歿也倪元璐爲作傳趙南星序其奏疏
鄒元標序其語錄其人品可以想見其集凡奏疏
一卷明道附言一卷詩草一卷文章一卷又一別

本題曰史太僕集所載亦同蓋一書而再刻也孟
麟本講東林學御史劉光復嘗斥東林又嘗糾李
三才及光復爭挺擊下獄孟麟乃疏救之東林頗
以爲疑孟麟與三才書曰論朋友則功名爲輕論
君臣則朋友之私義又輕可謂能見其大倪元璐
亦曰初趙公爲選部時先生曾未識面第以賢姦
消長繫國否泰情迫憂危勢無結舌苟容不惜再
棄官以伸公是不知者以爲爲友予謂是乃純爲
君耳何友之有然則孟麟在東林中爲超然於門

戶外矣至其文章則惟意所如無復修詞之功直
以餘事視之可也

方衆甫集十四卷

江蘇巡撫
採進本

明方應選撰應選字衆甫別號明齋華亭人萬厯
癸未進士官至盧龍兵備副使應選初牧汝州刻
有汝上詩文二集其子又增併遺藁刻爲此本其
詩古體頗清麗文筆亦尙健舉而漸染習尙未盡
脫當時風氣

葛太史集五卷

山東巡撫
採進本

明葛曦撰曦字仲明號鳳池德平人萬曆癸未進士官翰林院檢討據崇禎丙子其姪如麟後序稱全集八卷此本止五卷以原目較之尙佚論朶顏衛檄擬俘獻雲南叛夷露布重修順天府學記三首而勤政勵學箴一篇又不列入目錄參差錯亂莫之詳也其詩尙沿歷下餘派少精湛之思而音響亦自琅琅可誦較之竟陵公安以後鉤章棘句者尙有間焉

占星堂集十五卷

浙江孫仰曾家藏本

明唐文獻撰文獻字元徵南直隸華亭人萬厯丙戌進士官至禮部右侍郎翰林院學士謚文恪事迹具明史本傳朱彝尊靜志居詩話載文獻未第時曾見奎宿於堂上故以占星名其堂因以名集

大雲集

無卷數 兩江總督採進本

明曹璜撰璜字伯玉別號元素益都人萬厯丙戌進士官至通政司右參議是集鈔本凡十冊前無序目亦不分卷帙前四冊爲禠文及經解奏疏禪語然殘缺殊甚多不可讀後六冊則其官西安知

府及提學湖廣時案牘之文而西安爲最詳如社約救荒織造開礦諸規議大抵皆委曲懇到其言關中居天下阨塞戶口百萬乃此公私之積處之如掃守令無一人長思舉其事者而民惟寄死生於天河南之事奚保不再見也璜守西安在萬厯中年其於啟禎時事曲突移薪若有先見其解經則多影響支離至臨濟大意楞伽質義諸篇尤旁涉雜學蓋明季士大夫流於禪者十之九也

中秘草三卷

湖北巡撫
採進本

明李沂撰沂字景魯嘉魚人萬厯丙戌進士官至
吏科給事中劾東廠太監張鯨廷杖削籍後贈光
祿少卿事迹具明史本傳是集皆其爲庶吉士時
所作自記謂每月上旬中旬下旬試於翰苑者曰
館草每月朔望試於東閣者曰閣草皆詳錄當時
閣師館師評語未附載劾張鯨疏一篇及廷杖之
後王錫爵楊起元袁黃通問三尺牘

傳拙堂文集十二卷

浙江巡撫
採進本

明丁元薦撰元薦有西山日記已著錄元薦受業

顧憲成入東林黨籍當時以節行稱而文章質率
不出講學家窠臼

永思齋文集六卷

直隸總督
採進本

明李日茂撰曰茂字文華號培吾青縣人萬厯丙
戌進士官至山東按察司副使曰茂官御史時有
諫三王並封疏今載集中詞頗激直而明史王錫
爵傳載當時爭封議諸臣但有趙志臯張位史孟
麟羅萬化岳元聲顧允成張納陞陳泰來于孔兼
李啟美曾鳳儀鍾化民項德禎李騰芳等獨不及

日茂之名未詳其故至諫並封第二疏據行狀稱
撰稿未上乃亦收入集中則過矣第二三卷內多
案牘之文頗爲冗碎

溟池集十六卷

江蘇巡撫
採進本

明張文柱撰文柱字仲立崑山人萬厯戊子舉人
官臨清知縣是集前七卷爲詩賦後九卷爲雜文
每篇之下或標云見遺草見薄遊集見扇見題壁
見友人集抄蓋其後人博蒐佚稿而成也

容臺文集九卷詩集四卷別集四卷

兩淮馬裕
家藏本

明董其昌撰其昌有學科考畧已著錄其昌以書畫擅名論者比之趙孟頫其詩文則多率爾而成不暇研鍊詞章之學蓋不及孟頫多矣

竹素堂藏稿十四卷

浙江孫仰曾家藏本

明陳所蘊撰所蘊字子有上海人萬厯己丑進士官至南京太僕寺少卿是集凡雜文十一卷詩三卷前有王宏誨陳文燭序俱稱其官爲陳比部蓋在郎署時所輯也詩文摹擬太甚未能杼軸予懷詹景鳳明辨類函嘗稱所蘊文法汪伯玉幾爲敵

國詩健而潔近體亦似于鱗則其宗法概可見矣

青藜館集四卷

江蘇巡撫
採進本

明周如砥撰如砥字季平號礪齋卽墨人萬厯己丑進士官至國子監祭酒是集刊於崇禎壬午詩不及一卷餘皆雜文多館課及應酬之作如太上感應篇序之類亦備錄不遺編次殊爲蕪雜前有王思任公鶴二序思任序多稱其制藝鶴序多稱其德量其微意可思矣

小山草十卷

浙江巡撫
採進本

明郝敬撰敬有周易正解已著錄是編首爲鰕生
蠡管三卷首載闢佛書次則辨論經旨之文又襍
著三卷尺牘一卷家乘三卷蓋其小山草堂全書
之一種敬喜說經古文非所留意置之不論不議
可矣

姜同節集八卷

江蘇巡撫
採進本

明姜志禮撰志禮字立之丹陽人萬厯己丑進士
官至尙寶司卿致仕後加太常寺少卿是集惟第
五卷後半爲詩餘皆雜文所載諸疏論列時事頗

爲切直其守泉州時清還沙格澳及辨李相國僞
書事官兩廣時拒李鳳高竄兩瑯及擒叛猺韋尙
勝事政蹟多可稱官山東參政時以爭福王莊田
謫官官尙寶時河南進玉璽魏忠賢欲令表獻執
不可其風節亦殊可取詩文則類皆應酬之作也

劉直洲集十卷

浙江孫仰曾家藏本

明劉文卿撰文卿字篈如江西廣昌人萬厯己丑
進士官至南京兵部員外郎文卿性孤介嘗以忤
權姦左遷其文頗有英氣惟年僅三十三而卒功

候未深故風格未就集中如急選被論辨疏及海防二議台州金華二府興革條議亦可以考見時政也

吳繼疏集十二卷

江西巡撫採進本

明吳仁度撰仁度字君重金谿人萬曆己丑進士官至工部侍郎明史儒林傳附載其父悌傳末其集初刻於萬曆乙卯此本爲其六世從孫廷相所重編凡中書考功奏疏一卷撫晉奏議六卷撫晉全草三卷各註原本卷次於下又遺稿二卷各註

新增字撫州府志稱其爲文不拘訓詁每脫稿卽棄去故無存者此二卷蓋廷相摭拾殘剩附於奏議公牘之後者也仁度初除中書舍人時嘗爭三王並封之事其疏今載第一卷中撫晉時亦頗有擘畫遺稿則隨筆寫意而已

葉玉成全集四卷附錄二卷

浙江巡撫採進本

明葉永盛撰永盛字子沐涇縣人萬厯己丑進士官至太僕寺少卿事迹具明史本傳是集雜文一卷奏疏三卷爲其裔孫沃若等所刊當萬厯中葉

稅璫用事弊政百出永盛以御史巡視浙江鹽政
適姦人奏請增課稅璫持之甚急永盛獨抗疏糾
論屢折不回卒以無擾今諸疏及措置浙鹽始末
一篇具在集中明史本傳亦採錄其畧其他序啟
祭文之類僅二十餘首則其子孫姑存于澤而已
未附名宦錄一卷皆萬厯中請祀呈詳批荅案牘
及去思德政碑又鄉會中式錄一卷則永盛倡建
崇文書院疏請許商人占籍應試因紀厯科中式
姓氏以誌不忘所載至

國朝康熙中蓋後人所續入也是亦足見浙人之不忘永盛矣

李湘洲集十卷補遺一卷

湖北巡撫
採進本

明李騰芳撰騰芳字子實湘潭人萬厯壬辰進士官至禮部尚書其學宗王守仁故集中第二卷有陽明集抄序反覆幾二千言發明良知之旨至以事功節義與辭章養生均爲正道之障又有金剛經集注序金剛經注采序蓮池自知錄序皆提唱二氏之說亦頗尊崇李贄稱爲卓吾老子蓋明季

士大夫所見大抵如斯不但騰芳一人也然騰芳
留心經世喜談兵事其策倭安攘至計疏及進戚
繼光兵畧諸疏猶非徒以狂禪縱論者矣集無序
跋不知何人所編據卷首家傳稱其生平著作燬
於峒寇此本蓋由掇拾而成故十卷中多有錄無
書別以補遺一卷刻於末云

關中集四卷

兩江總督
採進本

明余懋衡撰懋衡字持國婺源人萬曆壬辰進士
官至南京吏部尚書事蹟具明史本傳是集乃其

巡按陝西時所作凡論說雜文共七十八篇所評
古今人物皆蹈襲陳言至謂封建井田爲可行尤
屬拘迂之見自序稱萬恩丁未杜門請告四閱月
而成帙中有自嗤一篇云窮年焚膏不得一二偶
得一二索紙書之紙墨未乾已規規失其大畧可
觀矣

綠滋館藁九卷

江蘇巡撫
採進本

明吳士奇撰士奇有史裁已著錄是集文八卷詩
一卷其文雖不能步趨歸唐而文從字順尙不蹈

王李膺古之習惟韻語牽率頗甚朱葵尊靜志居
詩話稱其長於史學詩特餘藝其殆然歟

靈護閣集八卷

浙江孫仰
曾家藏本

明湯兆京撰兆京字伯閔宜興人萬厯壬辰進士
官至監察御史事迹具明史本傳兆京廉正鯁直
佐孫丕揚掌察典尤力持公議爲羣小所嫉然律
身嚴正雖屢遭排擊卒不能以一言污之其制行
甚高詩文非所屬意亦皆不入格

西樓集十八卷

福建巡撫
採進本

明鄧原岳撰原岳字汝高閬縣人萬厯壬辰進士
官至湖廣按察司副使明史文苑傳附載鄭善夫
傳中是集詩十卷文八卷卷首謝肇淛所作小傳
謂原岳爲詩初學鄭善夫已又學七子旣而一意
摹古要以唐人爲宗末年益復宏肆今閱其詩功
候頗爲不淺惟未免有摹擬之痕也

繁露園集二十二卷

直隸總督
採進本

明董復亨撰復亨字元仲元城人萬厯壬辰進士
官至吏部郎中外轉布政司參政未上而卒是集

凡文十七卷詩五卷復亨沒後其同里張銓序而刻之其文喜剽掇詞藻如廣武郡理胡懷南治最承恩序曰間請所謂舉業讀之其沈詞怫悅如游魚銜鉤而出重淵之深其浮藻聯翩若翰鳥嬰繳而墜曾雲之峻其涵緜邈而吐滂沛又若風飛焱豎若芳糴馥而青條森也割裂文賦以入散體古今有是格律耶詩尤非所擅長矣

袁中郎集四十卷

兩江總督
採進本

明袁宏道撰宏道有觴政已著錄其詩文所謂公

安派也蓋明自三楊倡臺閣之體遞相摹仿日就庸膚李夢陽何景明起而變之李攀龍王世貞繼而和之前後七子遂以仿漢摹唐轉移一代之風氣迨其末流漸成偽體塗澤字句鉤棘篇章萬喙一音陳因生厭於是公安三袁又乘其弊而排抵之三袁者一庶子宗道一吏部郎中中道一卽宏道也其詩文變板重爲清巧變粉飾爲本色天下耳目於是一新又復靡然而從之然七子猶根於學問三袁則惟恃聰明學七子者不過贗古學三

袁者乃至矜其小慧破律而壞度名爲救七子之
弊而弊又甚焉觀於是集亦足見文體遷流之故
矣

游燕集二卷小草齋稿一卷

安徽巡撫
採進本

明謝肇淛撰肇淛有史牘已著錄游燕集二卷爲
萬厯己丑肇淛公車北上時所作小草齋稿一卷
則己丑還山後至辛卯復上公車時所作按黃虞
稷千頃堂書目肇淛有小草齋詩集三十卷文集
二十八卷又續集二卷此二集乃集中之二種非

完帙也

芙蓉館集二卷

浙江孫仰曾家藏本

明楊一葵撰一葵字翹卿漳浦人萬厯壬辰進士官至雲南布政使是集詩一卷文一卷詩格頗清文則多應酬之作首有蔣孟育序稱一葵先有豫章集及畫脂編行世今二書未見傳本其自序二篇則在此集中云

旭山集十六卷

浙江孫仰曾家藏本

明金忠士撰忠士字元卿宿松人萬厯壬辰進士

官至右僉都御史巡撫延綏是集詩止一卷餘皆
雜文忠士厯任邊疆所至皆有所建立其施設頗
見於集中第六卷內榆林河套諸考條列顛末述
盛衰之勢備撫治之方多可與史事相參核蓋皆
得之閱厯之實故其言確鑿可據固不必其文詞
之工也

石伯成詩稿四卷

直隸總督
採進本

明石九奏撰九奏字伯成翼州人萬厯壬辰進士
官至兵備副使進石參政其詩多學才調集而風

格未成朱彛尊明詩綜選入春郊一絕閱其全稿
實無有過之者也

水明樓集十四卷

福建巡撫
採進本

明陳薦夫撰薦夫名藻以字行更字幼儒閩縣人
萬厯甲午舉人朱彛尊明詩綜作名邦藻以集中
行狀考之明詩綜誤衍一邦字也是集詩九卷詩
餘一卷賦及雜文四卷考徐燾晉安風雅自薦夫
之曾祖燿祖達父輔之與其兄价夫皆以詩名其
家學淵源固有所自曹學佺爲之序稱其質癯而

腹腴語險而法中雖目不涉詩書跡不交山水能使下帷之夫駭其博雅好遊之士推其韻致則過其實矣

折腰漫草八卷

浙江孫仰曾家藏本

明華善繼撰善繼字孟達無錫人官至永昌府通判善繼與弟善述並有才名朱彞尊謂其詩不及善述然王貞序列四十子詩顧取善繼而善述不與焉殆以善述詩體格不純操縱任意不若善繼之愜適歟是集刻於萬曆甲午蓋善繼所自編也

奉使稿

無卷數 兩江總督採進本

明朱之蕃撰之蕃字元介荏平人南京錦衣衛籍
萬厯乙未進士第一官至吏部右侍郎之蕃以萬
厯乙巳冬被命使朝鮮丙午春仲出都夏抄入關
與館伴周旋有倡必和錄爲二大冊第一冊爲奉
使朝鮮稿前詩後雜著之蕃作也第二冊爲東方
和音朝鮮國議政府左贊成柳根等詩也末有乙
未制策一道及東閣倡和詩數首爲讀卷官沈演
等作蓋後人所附入案千頃堂書目載之蕃使朝

鮮稿四卷紀勝詩一卷南還雜著一卷廷試策一卷
落花詩一卷與此大同小異蓋所見者又一別
本云

清暉館集二卷

兩江總督
採進本

明謝廷諒撰廷諒有千金堤志已著錄是集上卷
爲詩下卷爲文前有萬厯戊子陳文燭序稱其學
問日畜變化無窮與胡應麟並稱今觀其所作亦
頗工麗自喜而邊幅太狹猶在少室山房集下也

溥遊草十五卷

浙江巡撫
採進本

明謝廷諒撰此集皆其從宦時所作故以薄遊爲名凡詩六卷文九卷明史藝文志載廷諒薄遊草二十四卷此止十五卷殆非完本矣

自愉堂集十卷

浙江巡撫
採進本

明來儼然撰儼然字望之三原人萬曆乙未進士官兵部主事是集凡文四卷詩六卷乃其子復臨所刊酬應尺牘居其大半他作亦多亢厲之音朱彛尊明詩綜不登一字殆病其羸歟

駱台晉文集八卷

福建巡撫
採進本

明駱日升撰日升字台晉泉州人萬厯乙未進士官至四川布政司參政殉奢崇明之難贈光祿寺卿日升以節義顯而文章不免漸染時趨未附解經數則及學約規條則其爲廣西提學僉事時以示諸生者也

尙友堂集二卷忠諫遺稿一卷

福建巡撫探進本

明林秉漢撰秉漢字伯昭一字聚五長泰人萬厯乙未進士官至浙江道監察御史巡按廣東卒贈太僕寺卿諡文端事蹟具明史本傳據張懋建所

作秉漢傳稱所著有館稿疏草尚友堂稿若鵝草
長山集此總名尚友堂集蓋高密單德謨爲之選
定哀爲一編惟其忠諫遺稿別爲一卷皆按粵時
奏疏也

元居集九卷附哀榮錄一卷

福建巡撫
採進本

明李春熙撰春熙字皞如號泰階建寧人萬厯戊
戌進士官至南京戶部郎中是集詩五卷文四卷
後附哀榮錄一卷詩分姑孰草彭城草旅言粵游
草燕游草白門草鄴中草七卷文則奏疏及征交

趾時文移公牘條議悉編入之第七卷中論代藩
爭立一疏尤其大節也集爲崇禎辛巳其子嗣元
所編此本又其裔孫芳所重雕据嗣元序當有十
二卷今止十卷然首尾完具又似非缺佚疑芳又
有所合併非盡原帙矣

蟄菴日錄四卷

兵部侍郎紀昀家藏本

明顧起元撰起元有說畧已著錄是集乃其天啟
壬戌癸亥兩年所作詩文曰蟄菴者自序謂足瘍
至冬輒發每寒月卽自繭一室塞向墜戶嘗自笑

以爲似昆蟲之入蟄因以名其菴云

樗全集七卷附錄一卷

福建巡撫
採進本

明王畿撰畿字翼邑號慕蓼晉江人萬厯戊戌進
士官至浙江布政使與講學之王畿同名非一人
也是集詩文共七卷末附家譜勸戒二十則爲一
卷畿立身居官矯矯自勵故所爲詩文皆質樸類
其爲人卷首序爲施邦曜所作畿視學浙江時拔
邦曜第一邦曜貧不能婚畿爲備聘拜雁於官署
邦曜卽於是秋登第後殉節爲完人其識鑒爲世

所推云

大旭山房集一卷

江西巡撫採進本

明鄧漢撰漢字遠遊自號簫曲山人建昌人萬厯戊戌進士官至僉都御史巡撫順天忤魏忠賢謫戍貴州崇禎初放還卒是集皆散體之文案明板唐文粹之首有漢序曰文家法秦漢非不善也然摹擬工則蹊徑太露構撰富則窠臼轉多至近日膚淺之法畏難好易眉山盛而昌黎河東二氏訕云云頗中明季古文兩派之病其自作則未能凌

跨一時也千頃堂書目有漢留夷館集四卷南中
集四卷紅帛集四卷不載此集殆偶未見歟

百花洲集二卷

江蘇巡撫
採進本

明鄧雲霄撰雲霄字元度東莞人萬厯戊戌進士
官至廣西布政司參政是集乃其官長洲時所作
故以百花洲爲名其詩近體居十之八九

解岌集一卷

兩淮鹽政
採進本

明鄧雲霄撰雲霄作冷邸小言論詩以妙悟爲宗
以自然爲用故茲集所載多仿王孟之音而醞釀

深厚則未及古人昔嚴羽作滄浪詩話標舉盛唐而所作乃惟存浮響雲霄所論所作蓋均似之矣

一齋詩集十三卷

福建巡撫採進本

明陳第撰第有伏羲圖贊已著錄是集凡粵草一卷詩文各半萬厯戊戌至庚子游廣東時作也寄心集六卷焦竑爲之選定皆四言五言古詩多涉論宗故別爲一集五岳游草六卷大抵紀遊之詠而雜詩亦散見其中不盡爲山水作也據原序尙有一集名塞曲乃官薊州遊擊時作此集不載蓋

佚之矣第韻書妙有神解遂爲言古音者之闢山
詩則信筆而成非所擅長然第亦不必以此擅長
也

緱山集二十七卷

浙江汪汝
璩家藏本

明王衡撰衡有紀遊稿已著錄萬厯戊子衡舉順
天鄉試第一時其父錫爵在政府爲高桂饒伸所
劾遂不復會試錫爵罷相後始登萬厯辛丑進士
第二入翰林旋即歸養得以其間肆力於古學與
王世貞雖同里閭而不蹈其蹊徑然頗染陳繼儒

之俗格明史隱逸傳稱錫爵招繼儒與衡讀書支
硯山其所由來者漸矣

許鍾斗集五卷

浙江孫仰
曾家藏本

明許獬撰獬有八經類集已著錄是集大抵應俗
之作館課又居其強半蓋明自正嘉以後甲科愈
重儒者率殫心制義而不復用意於古文詞洎登
第宦成菁華已竭乃出餘力以爲之故根柢不深
去古日遠况獬之制義論者已有異議則漫爲古
調其所造可知矣

劉練江集七卷附錄一卷

編修程晉芳家藏本

明劉永澄撰永澄字靜之寶應人萬厯辛丑進士官國子監學正乞歸省親起兵部職方司主事未上卒事蹟具明史本傳是集文六卷詩一卷附錄一卷乃永澄歿後其友劉宗周等共爲哀輯其文章平正通達而大致謹嚴篇首程朱藥言序尤爲深切蓋永澄雖與東林諸人遊而操履篤實故詞采不足而持論不詭於正無門戶標榜之習云

葉子詩言志十二卷

浙江巡撫採進本

明葉秉敬撰秉敬有字欒已著錄是編首載述職
吟心五卷乃大計入覲時作次載賦類十卷吟類
一卷乃督學河南時作次適徇編五卷則襍錄對
聯偶語自序稱取虞書詩言志論語志於學二語
以爲作詩要領故以此名其集秉敬淹貫羣書著
述甚富而所作韻語乃過於質朴殆所謂詩有別
才耶

元凱集五卷

福建巡撫
採進本

明陳勲撰勲字元凱閩縣人萬厯辛丑進士官至

戶部郎中福建通志載元凱集四十卷此本僅文
三卷詩二卷然首尾完足初非有闕集爲其同年
呂純如所刻或經純如選定耶勲爲鄭善夫外曾
孫其辦香有自故雖無傑構而尙有典型

白榆集二十卷

江蘇巡撫
採進本

明屠隆撰隆有篇海類編已著錄是集詩八卷文
十二卷隆爲人放誕風流文章亦才士之綺語陳
子龍明詩選謂其詩如衝繁驛舍陳列壺觴頃刻
辦就而少堪下箸文尤語多藻繪而漫無持擇蓋

沿王李之塗飾而又兼涉三袁之織佻也

由拳集二十三卷

內府藏本

明屠隆撰是集凡賦一卷古今體詩十卷雜文十二卷時隆方知青浦縣故以由拳爲名

玉茗堂集二十九卷

兩江總督採進本

明湯顯祖撰顯祖有五侯鯖字海已著錄顯祖於王世貞爲後進世貞與李攀龍持上追秦漢之說奔走天下歸有光獨詆爲庸妄顯祖亦毅然不附至塗乙其四部稿使世貞見之然有光才不逮世

貞而學問深密過之顯祖則才與學皆不逮而議
論識見則較世貞爲篤實故排王李者亦稱焉是
集凡詩十三卷文十卷尺牘六卷前有南豐朱廷
誨序稱其解陰符五賊禽制之法序春秋輯畧發
仁孝動天下之旨記小辨明復小乾大之一致非
無根據之學者然終非有光匹也

適適齋鑑鬚集七卷

福建巡撫
採進本

明陳玉輝撰玉輝字達卿號荆碧惠安人萬厯辛
丑進士官至南京監察御史所著有客客軒散言

皇芩草公餘課兒草岳陽草諸種此集乃其一也
凡語錄一卷文五卷詩一卷其子龍巖題識謂全
集未刻已經淪佚故所存者止此玉輝從鄒元標
講學其文章根柢尙爲醇正詩則隨意抒寫不求
甚工又多佚脫如白門紀懷七言律詩稱依上下
平韻次第當有三十首今僅存二十首則其殘缺
可知已

薛文介公文集四卷

江蘇巡撫
採進本

明薛三省撰三省字魯叔定海人萬厯辛丑進士

官至南京禮部尙書卒謚文介是編有文無詩奏
疏幾居其半奏疏中辭謝者又居其半惟請福王
之國一疏最爲激切其官檢討時所上也

叢桂軒集二卷

浙江朱彝尊家
曝書亭藏本

明吳大經撰大經字元常常熟人是集大經所自
編前有萬厯癸卯自序稱謝去帖括之學蓋山林
之士也其詩酷摹劒南圓熟有餘深微不足魏浣
初序乃謂袁宏道推明代詩人以徐渭爲第一而
大經配之殆非篤論矣

蟋蟀軒草

無卷數 山東巡撫探進本

明劉士驥撰士驥字允良禹城人萬厯甲辰進士官翰林院編修士驥於李攀龍爲鄉人而不循其門徑是集前有李若訥序稱允良自言少年濡首李王諸家顧李王生今日宜另繡其腸其不肯從風而靡不爲無見然集中詩文乃作啾緩之音是則楚旣失之齊亦未爲得也

四然齋集十卷

兵部侍郎紀昀家藏本

明黃體元撰體元字長卿穀城人萬厯甲辰進士

官至山東按察司副使是集體元所自編取中和
集身心世事謂之四緣委身寂然委心洞然委世
混然委事自然之語故以四然名齋因以名集蓋
明季士大夫耽二氏者十之九也

樊致虛詩集四卷

兩淮鹽政
採進本

明樊良樞撰良樞字尙植一號致虛進賢人萬厯
甲辰進士官至浙江提學副使是編凡匡山社集
一卷二山草三卷皆以所居地名之匡山取居近
匡廬之義二山則官淮南時取淮南大小山之義

也二山草中又附以其叔儁弟尙燦良楹子重鵬等次和之作大抵多規撫七子聲調

峽雲閣存草七卷後存草七卷

福建巡撫採進本

明魏瘡撰瘡有易義古象通已著錄其詩草本四十卷是集僅刪取十四卷故謂之存草存草爲未第時之詩後存草爲旣第後之詩其後存草內又分爲初燕詩農詩桂詩東詩東後詩家詩衡詩各一卷蓋皆隨宦跡所及各舉地名之一字以爲標目其詩不出贗古之習蓋萬厯以後之詩不公安

竟陵則仍太倉厯下耳

隆德堂詩文稿二卷

直隸總督採進本

明魏純粹撰純粹字仲乾栢鄉人萬厯甲辰進士官至監察御史是集詩文各一卷多其官永城知縣時作未附爲御史請假省親疏一篇

蕘言六卷

兩江總督採進本

明余懋孳撰懋孳字舜仲婺源人萬厯甲辰進士官至給事中此集乃懋孳所自編凡文五卷詩一卷其曰蕘言者蓋取蕘稗之意自謂學而無當於

道者稗學也言而無當於道者蕆言也又謂命題屬草聊供酬應今觀其文如門牆桃李冊序刻聯捷稿引細草流芳冊小引題龍山課藝等篇皆不免俗體蓋疎於芟汰之過也

皆春園集四卷

兩淮鹽政
採進本

明陳完撰完字名甫號海沙南通州人萬歷丙午舉人是集爲完所自編其詩多恬適敷暢而不見性情較黃省曾五岳山人集格調相似而才力尙不能逮也

達觀樓集二十四卷

江西巡撫
採進本

明鄒維璉撰維璉字德輝號匪石新昌人萬厯丁未進士官吏部郎中時以疏劾魏忠賢謫戍貴州崇禎初召爲南京太僕寺卿洊擢右僉都御史巡撫福建剿海寇有功終爲溫體仁所忌罷崇禎八年起爲兵部右侍郎未上而卒事迹具明史本傳是編詩集凡六卷曰願學編蓋早年初學之作曰宦遊草作於司理延平時曰友白草作於貴州謫戍時蓋擬太白之流夜郎也曰友歐草作於起官

太僕時益南太僕署在滁州多歐陽修遺跡也曰
導噫草中多感慨時事之什蓋作於撫閩時也文
集凡十八卷首冠以四書五經疑義中如信豐坊
僞石經信俞庭椿改周禮信蔡沈三代改時不改
月諸說皆未爲卓識蓋其氣節才畧足以自傳學
問則未深造也據編首自序尙有大夢稿又夢稿
自警編諸目此本皆無之或維璉自刪或後來所
佚均不可考矣

掃餘之餘三卷附歸涂閒紀一卷

浙江巡撫
採進本

明劉錫元撰錫元字玉受長洲人萬厯丁未進士
官至貴州提學僉事是集第一卷庚夏七發記其
庚申夏病疫事二卷爲序記簡牘雜文三卷爲雜
注乃其官祠部時考驗衆僧雜作附歸涂閒紀一
卷則記其官黔中苗亂事大抵多作佛家偈語間
涉俳體

湛園集十卷

山西巡撫
採進本

明程正巳撰正巳字道先號澄源長治人萬厯丁
未進士官至僉都御史巡撫保定以忤奄黨削職

後終於兵部侍郎是集爲其子之璿所編凡詩五
卷文五卷大抵惟取自適無意求工

